

MAREKO

POLICE MOTU



SIVARAI NAMO
MAREKO IA GWAURAIA


(St. Mark in Police Motu)

Published by

THE BRITISH & FOREIGN BIBLE SOCIETY

London — Canberra — Cape Town — Toronto — Wellington

1964



Kamelo

MAREKO IA GWAUR AIA

KAROA 1

1 Dirava ena Natuna Iesu Keriso ena sivarai namo ia matamaia inai bamona.

2 Peroveta tauna ladana Isaia ia torea, Oiemu vairana dekenai lauegu hesiai tauna lau siaia. Oiemu dala ia do karaia hegaegae. 3 Ta ia boiboi taunimanima idia noho lasi gabuna dekenai inai bamona, "Lohiabada ena dala umui karaia hegaegae, iena dala hamaoromaoroa." 4 Ioane Bapatiso ia mai, taunimanima idia noho lasi gabuna dekenai ia haroro. Ena haroro be, taunimanima idia helalo kerehai, bona bapatiso abia, kara dika gwauatao toana. 5 Iudea kahana taudia bona Ierusalem hanua taudia ibounai idia lao Ioane dekenai. Idia gwau, Ai be kara dika taudia, bona Ioane ia bapatiso henia idia dekenai Ioridane sinavai lalonai.

6 Ioane ena dabua be kamelo huina bona ena beleta be boromakau kopina. Iena aniani be kwadi bona hani. 7 Ia haroro, ia gwau, Tau ta lauegu murinai dohore ia mai, iena sياهو ia bada, lauegu sياهو ia maragi. Inai tau ena tamaka varona, lau be hegeregere lasi lau ruhaia. 8 Lau bapatisoa umui ranu dekenai, to dohore inai tau ia bapatisoa umui Lauma Helaga dekenai.

Ioane ese Iesu ia bapatisoa

9 Unai neganai Iesu Nasaret hanua Galilea kahana dekenai amo ia mai, bona Ioane ese ia bapatisoa Ioridane sinavai lalonai. 10 Iesu ranu ia rakatania neganai, nega tamona ia itaia guba ia kehoa, bona Lauma ia diho ia

6 hani = aniani ta, manu maragi maragi ese idia atoa ia digara.

dekenai pune bamona. 11 Bona guba dekena amo gado ta ia hereva, Oi be lauegu Natuna. Lau lalokau henia oi. Lau moale bada oi dekenai.


Satana ese Iesu ia dibagania

12 Vadaeni nega tamona Lauma ese ia siaia taunimanima idia noho lasi gabuna dekenai. 13 Dina 40 ia noho taunimanima idia noho lasi gabunai, unuseni Satana ese ia dibagania. Dagedage boromadia Iesu danu idia noho, bona aneru ese ia idia naria.

Iesu ena gaukara ia matamaia Galilea dekenai

14 Ioane idia atoa diburai murinai, Iesu ia mai Galilea dekenai, Dirava ena sivarai namo ia harorolaia. 15 Ia haroro, Harihari be Dirava ena nega, bona Dirava ena basileia kahira-kahira ia ginidae. Umui helalo kerehai, sivarai namo umui abidadama henia.

16 Iesu ia raka Galilea davara kone dekenai, Simon mai ena tadikaka Andrea danu ia itaia. Idia ruaosi be davara dekenai reke idia negea, badina idia be haoda tau-dia. 17 Iesu ia gwau, Umui mai lauegu murinai, dohore sياهو lau henia umui dekenai, umui do haoda karaia, taunimanima umui abia. 18 Nega tamona edia reke idia rakanania, ia murinai idia raka.



19 Sisina ia raka, Iakobo, Sebedeo ena natuna mai Ioane iena tadikaka ia itaia. Vanagi ai idia edia reke idia hanamoa karaia. 20 Ia gwau, Laegu murinai umui raka mai. Vadaeni, edia tamana Sebedeo mai gaukara memero vanagi ai idia rakatania, ia murinai idia raka lao.

Kaperanaum hanua dekenai

21 Idia lao Kaperanaum hanua dekenai, unuseni Dina Helaga neganai dubu lalonai ia hadibaia. 22 Idia hoa bada ena hadibaia hereva dekenai, badina mai siahu danu ia hereva, itorena taudia bamona lasi. 23 Inai edia dubu dekenai be tau ta mai lauma dikana ia noho. Ia boiboi, 24 Iesu Nasaret hanua tauna, badina dahaka oi mai ai dekenai? Ai haorea totona oi mai? Lau diba oi. Oi be Dirava ena Helaga Tauna. 25 Iesu ia gwau henia, Hereva lasi, inai tau oi rakatania lao. 26 Lauma dikana ese inai tau ia hamarerea bada herea, bona mai boiboi bada danu ia murimuri lao. 27 Itaia taudia ibounai idia hoa bada, idia herevahereva sibodia dekenai, Inai dahaka? Hadibaia gauna matamata? Iena siahu dekenai lauma dikadia danu ia gwau henia, bona iena hereva gauna idia karaia. 28 Nega sisina ena kara sivarai Galilea kahana dekenai noho taudia ibounai idia kamoni.

29 Dubu ia rakatania neganai Simona bona Andrea edia rumai ia raka vareai. Iakobo bona Ioane danu. 30 Simona adavana ena sinana ia gorere dainai ia hekure noho mai kopina siahu bada. Nega tamona Iesu idia hamaoroa 31 Ia mai, hahine ena imana ia abia. Bona ia ese hahine ia. abia isi. Vadaeni, inai hahine ena gorere ia doko, bona ia toreisi bona aniani ia abia idia dekenai.


32 Adorahi, dina ia diho neganai, gorere taudia bona mai lauma dikadia taudia ibounai idia mailaia ia dekenai. 33 Hanua taudia ibounai idia mai, idia hebou iduara dekenai. 34 Gorere idauidau taudia momo ia hanamoa. Bona lauma dikadia momo ia lulua, bona lauma dikadia edia hereva dala ia koua, badina idia diba ia.

Galilea hanuadia dekenai ia haroro

35 Daba maragi, dina ena diari ia mai lasi neganai, ia toresi, taunimanima lasi gabuna dekenai ia lao, unuseni ia guriguri. 36 Simona mai ena bamodia danu idia tahua lao. 37 Idia davaria neganai idia gwau, Taunimanima ibounai idia tahua oi. 38 Ia hereva, Namo ita lao hanua haida, unuseni lau ura haroro karaia, badina inai totona lau mai. 39 Bona ia lao Galilea hanua ibounai dekenai. Unuseni edia dubu lalonai ia haroro, bona lauma dikadia ia lulua.

Lepra tauna ia hamauria

40 Lepra tauna ta ia mai ia dekenai, ia tui diho bona ia noia, ia gwau, Bema oi ura, mani oi hanamoa lau, badina oiemu siahu be hegeregere. 41 Iesu mai bogahisihisi danu imana ia atoa lepra tauna ena kopinai. Ia gwau, Lau ura. Hari oi goeva. 42 Nega tamona lepra gorere ia ore, tauna ia goeva vadaeni. 43 Nega tamona Iesu ese ia siaia bona ia sisiba henia, 44 ia gwau, Tau ta oi hamaoroa lasi, to oi lao dubu helaga tauna dekenai, oiemu kopina goeva ia itaia totona. Bona Mose ena taravatu hegeregere, oi goeva dainai, harihari gauna Dirava dekenai oi henia. Inai oi



karaia neganai oiemu goeva be momokani vadaeni idia dekenai. 45 To ia lao gabu idauidau dekenai unai kara sivaraina taunimanima ibounai dekenai ia haroro hedinarai, unai dainai Iesu ia lou mai lasi hanua dekenai, to gunika dekenai ia noho. To unuseni danu kahana ibounai dekenamo taunimanima idia mai ia dekenai.

KARAO 2

Iesu ese kara dika ia gwauatao

1 Dina haida murinai ia mai lou Kaperanaum hanua dekenai, bona haida idia gwau ia noho rumai. 2 Hutuma bada idia vareai hebou, ela bona ruma ia honu momokani, bona iduara vairanai danu be gabu lasi. Ia ese ia haroro, idia kamona. 3 Taudia 4 ese marere diba lasi gorere tauna ta geda latanai idia huaia lao ia dekena. 4 Idia ura vareai to dala lasi hutuma bada dainai. Idia daekau guhi dekenai, guhi kahana idia kokia. Guhi matu ia noho gabunai marere diba lasi gorere tauna mai geda danu idia atoa diho lao Iesu ia gini gabuna vairanai. 5 Iesu ese edia abidadama kara ia itaia. Bona gorere tauna ia hamaoroa, Natugu, oiemu kara dika be gwauatao vadaeni.

6 Itorena taudia haida idia helai unuseni, bona lalodia dekenai idia laloda momo. 7 Inai bamona, Badina dahaka ia hereva unai bamona? Inai be Dirava ladana ia hadikaia. Daika ese ia hegeregere kara dika ia gwauatao? Dirava sibona mo. 8 Nega tamona Iesu sibona ena lalona ia diba idia laloda unai bamona. Ia gwau, Badina dahaka umui emui lalona lauegu kara umui gwau henia? 9 Edana hereva be ia haraga, gorere tauna lau hamaoroa, "Oiemu kara dika be gwauatao vadaeni," o, "Toreisi, oiemu geda oi abia isi, oi raka lao ruma dekenai?" 10 Lau ura umui diba namonamo Taunimanima Natuna ena sياهو be ia hegeregere tanobada dekenai kara dika ia gwauatao. Unai dainai ia ese marere diba lasi gorere tauna ia hamaoroa. 11 Lau hamaoroa oi, oi toreisi, oiemu geda oi abia isi, bona oi lao ruma dekenai. 12 Nega tamona ia toreisi, ena geda ia abia isi, bona murimuri dekenai ia raka. Ibounai

idia itaia, idia hoa bada herea, Dirava dekenai idia hanamoa henia. Idia gwau, Guna inai bamona ita itaia lasi!

Iesu takis abia taudia danu

13 Ia lao lou kone dekenai, taunianima ibounai ia dekenai idia hebou, ia hadibaia. 14 Ia raka lao neganai, Alfeo ena natuna ladana Levi ia itaia, ia helai takis moni abia gabuna dekenai. Iesu ia gwau, Oi mai lauegu murinai. Ia toreisi, ia murinai ia raka.

15 Iesu mai ena diba tahua taudia idia aniani ruma laloi. Bona takis abia taudia momo bona kara dika taudia momo idia mai, idia helai Iesu mai ena diba tahua taudia danu. Badina be momo iena murinai idia raka. 16 Farisea edia itorena taudia ese Iesu idia itaia, ia aniani takis abia taudia bona kara dika taudia danu, idia iena diba tahua taudia idia nanadaia, Badina dahaka ia be takis abia taudia bona kara dika taudia nega tamona idia aniani? 17 Edia hereva Iesu ia kamoni, ia gwau, Doketa ia mai lasi goada taudia dainai, to gorere taudia dainai ia mai. Lau mai lasi kara maoromaoro taudia boiria totona, to lau mai be kara dika taudia boiria totona.

Iesu ena diba tahua taudia idia anivaga lasi

18 Nega ta Ioane ena diba tahua taudia bona Farisea taudia idia anivaga neganai, haida idia mai, Iesu dekenai idia nanadaia, idia gwau, Badina dahaka Ioane bona Farisea edia diba tahua taudia idia anivaga, to oiemu diba tahua taudia idia anivaga lasi? 19 Iesu ia hereva, Umui laloi, headava matamata tauna ena turadia danu ia noho neganai, idia anivaga, a? Ia noho idia danu neganai idia anivaga laloi diba lasi. 20 To dina ta taudia ese headava matamata tauna do idia abia lao. Unai dina iena turadia idia do anivaga.

21 Daika tauna be, dabua gunana dekenai, dabua matamata taina ia turia, hanamoa totona? Bema unai bamona, matamata gauna dohore ia veria, ia darea, bona matu dika-

18 anivaga = nega haida dubu taudia idia aniani lasi, taravatu dainai.

na ia vara. 22 Daika tauna be, kopina gunana lalonai, uain matamata ia bubua? Bema unai bamona, uain ese kopina ia darea, uain ia bubua kava, bona kopina ia dika vadaeni. To namo be uain matamata, kopina matamata lalonai idia atoa.

*Uain
udaia
kopina*



Diba tahua taudia ese Dina Helaga ena taravatu ta idia naria lasi

23 Dina Helaga ta, koni ia tubu gabunai ia raka neganai, iena diba tahua taudia ese koni huahua haida idia kokia. 24 Farisea taudia ia dekenai idia nanadaia, idia gwau, Badina dahaka idia ese mai taravatu kara idia karaia Dina Helaga neganai? 25 Ia haere henia, Umui duahia lasi David ena kara, ia bona ena taudia idia hitolo mase, aniani be lasi neganai? 26 Abiata ia dubu biaguna badana neganai, David ese Dirava ena dubu ia vareai, idia atoa Dirava vairanai paraoana ia ania, iena taudia dekenai ia henia danu. Unai paraoa be helaga momokani, dubu ena helaga taudia sibona idia ania diba.

27 Idia dekenai ia hamaoroa, Dirava ese Dina Helaga ia karaia taunimanima dainai, Dirava ese taunimanima ia karaia lasi Dina Helaga dainai. 28 Unai dainai Taunimanima Natuna be Dina Helaga ena Lohiabada.

22 kopina = Iuda taudia edia kavabu idia karaia nani kopina amo.

KARAO 3

1 Ia dubu lalonai raka vareai lou, unuseni be imana ia dika tauna ia noho. 2 Vadaeni, idia ese Iesu idia itaia namonamo. Bema hanamoa kara ia karaia Dina Helaga dina neganai idia do samania. 3 Ia ese unai imana ia dika tauna ia hamaoroa, Oi toreisi, oi mai. 4 Ia nanadaia idia dekenai, ia gwau, Taravatu be dahaka? Kara namo ita karaia Dina Helaga neganai, o, kara dika ita karaia? Ta ita hamauria o ita hamasea? To idia be hereva lasi. 5 Mai badu bona lalohisihisi danu ia itadia, badina lalodia be auka. Ia ese gorere tauna ia hamaoroa, Oiemu imana oi abia isi. Ia abia isi, vadaeni imana ia namo lou, imana kahana bamona. 6 Nega tamona Farisea taudia idia lao murimuri ai bona Herod ena kahana taudia danu idia herevhereva, ia idia alaia dalana idia tahua.

Gorere taudia haida ma Iesu ia hamauria

7 Iesu mai ena diba tahua taudia danu idia lao kone dekenai, bona Galilea mai Iudea taudia momo herea ena murinai idia raka. 8 Momo herea iena kara sivarai idia kamoni, bona idia mai ia dekenai. Idia mai Ierusalem, Idumea, Ioridane unai kahana, Turo bona Sidono kahana dekena amo. 9 Ia ena diba tahua taudia ia hamaoroa vanagi ta idia abia mai, inai hutuma ese iena gaukara dalana koua garina. 10 Badina be guna, gorere taudia momo ia hamauria dainai, hari gorere taudia idau idia mai ia kahira-kahira, idia ia kamokau totona. 11 Lauma dikadia ese ia idia itaia neganai, idia moru diho, idia boi-boi, Oi be Dirava ena Natuna. 12 Bona ia gwau henia iena ladana idia hedinarai lasi.

Diba tahua taudia 12 Iesu ia abia hidi

13 Ia daekau ororo dekenai. Unuseni ia ura henia taudia ia boiria, bona idia mai ia dekenai. 14 Bona taudia 12 ia abia hidi, ia dekenai dohore idia noho totona. Ia do siaia, haroro idia karaia totona, 15 bona lauma dikadia lulua

siahu ia henia idia dekenai. 16 Taudia be inai. Simona, ladana matamata ia henia, Petro, 17 Iakobo, Sebedeo ena natuna, bona iena tadikaka Ioane, ladana matamata ia henia idia dekenai, ladana be Boanere, anina be, "guba regena natudia", 18 Andrea, bona Filipino, bona Batolomeo, bona Mataio, bona Toma, bona Iakobo, Alfeo ena natuna, bona Tadeo, bona Selote tauna ladana Simona, 19 bona Iuda Iskariote, Iesu ia samania tauna.

20 Idia vareai ena rumai. Idia ura aniani to hutuma bada idia hebou lou dainai idia be aniani dala lasi. 21 Iena varavara idia kamoni neganai idia lao ia abia bona naria totona, badina haida idia gwau ia kavakava.

Itorena taudia idia badu Iesu dekenai

22 Itorena taudia idia mai Ierusalem dekena amo, idia gwau, Beel-sebul ia noho ia lalonai, bona, Lauma dikadia edia biaguna ena siahu dekenai ia ese lauma dikadia taunimanima dekena amo ia lulua. 23 Bona ia boiridia idia mai ia dekena, bona parable dekenai ia hereva idia dekenai. Ia gwau, Edana bamona Satana sibona ese Satana do ia lulua? 24 Bema gavamani ta taudia idia siria bona heai momo, dohore unai gavamani ia gini diba lasi. 25 Bema iduhu ta taudia idia siria bona heai momo, unai iduhu ia gini diba lasi. 26 Bema Satana sibona lalona ia heai bona sibona ia siria, dohore ia noho diba lasi, ena dokona be kahira-kahira.

27 Henao tauna be ia hegeregere lasi goada tauna ena ruma ia vareai. To bema goada tauna ia kwatua guna, vadaeni, unai neganai ia hegeregere kohu henaoo.

28 Momokani lau hamaoroa umui, Dirava ese taunimanima edia kara dika ibounai ia gwauatao diba, bona Dirava ena ladana hadikaia hereva danu. 29 To, bema tau ta Lauma Helaga ena ladana ia hadikaia, gwauatao ia do abia lasi. Iena dika ia noho hanaihanai, kokia dalana be lasi. 30 Inai hereva ia henia badina be idia gwau lauma dikana ia noho ia lalonai.

Iesu ena varavara korikori

31 Iena tadidia bona iena sinana idia mai, murimuri ai idia gini. Hereva idia siaia, idia ura itaia. 32 Hutuma bada herea ia kahira-kahira idia helai, idia gwau, Oiemu sinana bona tadina bona taihuna idia noho murimuri ai, idia tahua oi. 33 Ia haere henia, Lauegu sinana bona tadina be daika? 34 Iena matana ia negea unuseni helai taudia dekenai, ia gwau, Lauegu sinana bona lauegu tadina be inai. 35 Dirava ena ura idia karaia taudia, unai taudia be lauegu tadina, bona lauegu taihuna, bona lauegu sinana.

KAROA 4*Parabole—Uiti hadoa*

1 Ia hadibaia lou kone dekenai. Bona taunimanimi momo idia hebou ia dekenai. Hutuma edia bada dainai vanagi ta dekenai ia guia davara latanai. Vanagi latanai ia helai, bona hutuma idia noho kone dekenai. 2 Gau momo ia hadibaia parabole dekenai. Ena hadibaia hereva lalonai ia gwau,

3 Umui kamonai. Tau ta ena uhe ia hadoa tano dekenai. 4 Ia hadoa neganai uhe haida idia moru dala dekenai, bona manu idia mai idia ania. 5 Uhe haida idia moru nadi dekenai, unuseni tano momo lasi dainai idia tubu haraga, badina be tano ia dobu lasi. 6 Dina ia daekau neganai, ena siahu ese uhe matamata ia hamasea, badina be ramudia lasi. 7 Uhe haida be idia moru ava ginigini lalonai, bona uhe edia tubu dala ava ginigini idia koua,


7 ava ginigini = rei
dikanai, ia ese rei namona
ena tubu dala ia koua.



bona au huahua ia atoa lasi. 8 To uhe haida ia moru tano namona dekenai, idia tubu namo herea, huahua idia atoa, haida 30, haida 60, haida 100. 9 Ia gwau, Mai taiana tauna, namo ia kamona.

Uiti

*uiti = aniani gauna,
raisi bamona.*



10 Gabeai, ia sibona ia noho neganai, ia kamona henia taudia mai iena taudia 12 ese parabole anina idia tahua. 11 Ia hereva idia dekenai, ia gwau, Dirava ena basileia hereva ia hunia lasi umui dekenai, to murimuri taudia dekenai, gau ibounai lau hadibaia parabole dekenai. 12 Buka Helaga ia gwauraia inai, "Idia itaia, to anina idia diba lasi, bona idia kamona, to hereva anina idia davarua lasi, idia helalo kerehai garina, bona edia dika be gwauatao garina."

13 Ia hamaoroa idia dekenai, Bema inai parabole anina umui diba lasi, edana bamona parabole haida anina dohore umui diba? 14 Uhe hadoa tauna be, Hereva ia hadoa. 15 Taunimanima haida be unai Hereva ia moru dala dekenai tano bamona. Idia hereva kamona, nega tamona Satana ia mai, idia lalonai hadoa Hereva gauna ia abia lao. 16 Hegeregere, uhe haida idia moru nadi dekenai, be tau haida bamona. Hereva idia kamona neganai idia abia dae haraga mai moale danu. 17 To idia be ramu lasi dainai, nega sisina mo idia goada. Gabeai nega dika bona dagedage ia mai neganai Hereva dainai, idia moru haraga. 18 Bona haida be uhe ia moru ava ginigini

lalonai hegeregere. Inai taudia be Hereva idia kamona
vadaeni, 19 to tanobada gaudia dekenai laloa momo bona
kohu ena koikoi, bona ura dika idauida dainai, Hereva
tubu dala idia koua. Bona au huahua idia atoa lasi. 20 To
haida be tano namona hegeregere. Hereva idia kamona,
idia abia dae goada, idia au huahua abia. Haida 30, haida
60, haida 100.

Diari herevadia

21 Idia dekenai ia hereva, ia gwau, Lamepa ita abia
neganai ita atoa uro lalonai, o mahuta pata henunai? Lasi,
lamepa ena gini gabuna dekenai ita atoa. 22 Hunia gaudia
ibounai dohore idia hedinarai, koua gaudia ibounai dohore
idia kehoa. 23 Mai taiana tauna, namo ia kamona.

24 Bona ia gwau, Umui kamona gaudia umui laloa
namonamo. Umui henia hegeregere, dohore unai bamona
idia henia lou umui dekenai, bona gau haida danu. 25 Mai
ena gau tauna, gau haida danu do ia abia, to gau lasi
tauna, ena gau abia dala do ia koua.

Parabole—Uhe sibona ia tubu


26 Dirava ena basileia be inai bamona. Tau ta tano
latanai uhe ia negea. 27 Ia mahuta, ia toreisi, hanuaboi
bona dina, bona uhe hadoa gauna ia tubu bona vara, to
hadoo tauna ia diba lasi edana bamona uhe ia tubu. 28 Tano
sibona huahua ia havaraia, rau ia tubu guna, gabei
kwarana, inai murinai be anina ia vara. 29 To anina ia
mage neganai karaharaga ia utua kaia dekenai, badina
huahua gogo negana ia ginidae.

Parabole—Mustard au nadinadi

30 Ia gwau, Dirava ena basileia be dahaka bamona?
Edana parabole dekenai anina ita hedinarai? 31 Ia hege-
regere *mustard* au nadinadi bamona, tano dekenai hadoa
neganai be ia maragi-maragi, tanobada ena uhe idauida
edia bada ia henunai. 32 To idia hadoa, bona ia tubu

31 mustard = aniani haida edia mamina hanamo gauna.

25 gau = kohu sibona lasi, to lauma gau namodia danu.



*Mustard
au*

neganai, ia bada herea, aniani ava ibounai edia bada ia hanaia, ena rigi danu be bada herea bona atai manu idia helai unuseni, ena keruma dekenai.

33 Bona parabole unai bamona momo dekenai ia hadibaia, edia kamonaia diba hegeregere. 34 Ia hadibaia parabole dekenai mo. To gabeai, ia bona iena diba tahua taudia sibona idia noho, anina ibounai ia hadibaia idia dekenai.

Iesu ese lai bona hurehure ia hadokoa

35 Unai dina, adorahi neganai, ia hamaoroa idia dekenai, Davara unai kahanai ita hanaia lao. 36 Vadaeni, idia ese hutuma idia rakanania, ia danu vanagi idia guia, idia heau. Vanagi haida danu idia lao. 37 Lai bada herea ia mai bona hurehure bada danu, ela bona kahira-kahira vanagi ia honu. 38 Iesu ia mahuta vanagi duduna dekenai, geda manoka-manoka latanai. Idia lao ia dekenai, idia haoa ia noga. Idia gwau, Hadibaia tauna e, oi laloa lasi, kahira-kahira ita mase? 39 Vadaeni ia toreisi, lai dekenai ia gwau henia, bona davara dekenai ia hereva, ia gwau, Umui doko, umui maino noho. Vadaeni. Nega tamona lai ia doko, bona hurehure be lasi. 40 Ia gwau, Umui dahaka gari momo? Edana bamona umui be abidadama lasi? 41 Idia hoa bona gari bada, idia hereva, Inai tauna be daika? Lai bona davara iena hereva idia kamonaia henia.

KAROA 5

Iesu ese kavakava tauna ia hanamoa

1 Davara unai kahanai kone dekenai idia kamokau, tano ladana Gerasa. 2 Ia ese vanagi ia rakatania neganai gara gabuna dekenai noho tauna ta ia mai ia dekena. Lauma dikana ia noho inai tau lalonai. 3 Taunimanima be hegeregere lasi idia dogoatao, bona idia kwatua diba lasi. Auri kwatua gaudia danu be hegeregere lasi. 4 Nega momo auri kwatua gaudia dekenai ena imana bona ena aena idia guia, to imana bona aena kwatua gaudia ia makohia ore. Tau ta ese hamanadaia hegeregere lasi. 5 Dina ibounai, hanuaboi danu, gara gabuna dekenai bona ororo dekenai, ia tai bona boiboi, bona iena kopina ia utua nadi dekenai. 6 Daudau dekenai ia Iesu itaia, ia heau ia dekena bona ia toma diho henia. 7 Ia boiboi goada, Dahaka oi ura karaia lau dekenai, Iesu, Dirava ataia momokani ena Natuna? Dirava ena ladana dainai lau noinoi, oi hahisia lau lasi. 8 Badina Iesu ia gwau, Vadaeni, lauma dikana e, inai tau oi rakatania, oi lao. 9 Bona Iesu ia gwau, Oiemu ladana be daika? Ia haere henia, Lauegu ladana be Hutuma, badina ai be momo herea. 10 Ia noinoi goada Iesu dekenai, Mani oi lulua ai daudau lasi. Ai ura noho inai tano dekenai.

11 Unuseni ororo ta dekenai boroma momo herea idia aniani noho. 12 Lauma dikadia idia noinoi Iesu, Oi siaia ai boroma dekenai, bona boroma lalonai ai vareai. 13 Vadaeni Iesu ese ia siaia, bona lauma dikadia idia lao vareai boroma lalonai. Nega tamona ororo dekena amo boroma idia heau diho lao, idia moru davara dekenai. Ibounai idia malo. Idia be 2000 bamona.

14 Boroma naria taudia idia heau lao hanua dekenai, bona uma gabudia, sivarai idia hereva karaia. Gabeai taunimanima idia lao, dahaka ia vara gauna idia itaia. 15 Hanua taudia idia mai Iesu dekenai. Guna mai lauma Hutuma tauna idia itaia. Ia helai diho, mai dabua, iena lalona be namo lou. Idia gari. 16 Itaia taudia ese boroma bona lauma dikadia lulua sivarai idia hamaoroa hanua taudia dekenai. 17 Iesu dekenai idia noinoi edia tano ia rakatania.

18 Vanagi dekenai Iesu ia guia neganai, unai guna mai lauma dikadia tauna ese ia noinoi ia dekenai, ia gwau, Lau ura loaloe oi danu. 19 Iesu ia gwau, Lasi, oi lao oiemu varavara bona turana dekenai, Lohiabada ia bogahisihisi oi dekenai, bona ia hamauria oi sivarai oi hamaoroa. 20 Bona ia lao Hanua Gwauta, unuseni ia ese Iesu ena kara ia dekenai sivaraina ia harorolaia, taunimanima ibounai idia hoa bada.

Iairo ena natuna kekeni

21 Iesu vanagi dekenai ia hanaia lou davara unai kahanai, hutuma bada idia hebou ia dekenai, ia noho kone dekenai. 22 Dubu lohiana ta, iena ladana be Iairo, ia Iesu itaia neganai ia lao, ia diho Iesu ena aena badinai. 23 Ia noinoi goada, Egu natuna kekeni maragina be kahirakahira ia mase, lau noinoi, mani oi mai, oiemu imana oi atoa ia latanai, oi hamauria. 24 Iesu dubu lohiana danu ia lao, hutuma bada idia hegegea bona ena murinai idia raka.

25 Hutuma lalonai be hahine ta. Inai hahine ia gorere lagani 12, ena gorere be rara moru. 26 Muramura taudia momo iena gorere idia hanamoa gwauraia, to idia be hegeregere lasi. Iena moni bona kohu ia nega ia ore, to iena gorere be ia bada noho. 27 Iesu ena kara sivarai ia kamonai. Unai dainai ia mai, hutuma lalonai ia vareai, Iesu ena dabua ia dogoatao. 28 Badina be ia gwau, Bema iena dabua mo lau dogoatao, mauri lau davaria. 29 Nega tamona rara gorere ia doko, hahine sibona lalona ia diba iena gorere ia ore. 30 Iesu ia diba iena lalona amo hamauria sialu ia lao murimuri ai, unai dainai ia giroa, taunimanima dekenai ia nanadaia, Lauegu dabua daika ia dogoatao? 31 Iena diba tahua taudia idia gwau, Hutuma bada herea oi kahira-kahira idia gini, idia dogoatao oi, badina dahaka oi gwau, "Daika ia dogoatao lau?" 32 To ia giroa, ia dogoatao tauna ia tahua. 33 Unai hahine ia heudeheude mai gari danu, ia diba dahaka ia vara ia dekenai. Ia mai, ia diho Iesu vairanai, bona ena sivarai idoinai ia hamaoroa ia dekenai. 34 Iesu ia gwau, Lauegu natuna, oiemu abidadama dainai mauri oi davaria vadaeni, oi lao mai maino danu, bona oiemu gorere do oi davaria lou lasi.

35 Ia hereva noho neganai, dubu lohiana ena taudia haida ena ruma dekena amo idia mai. Dubu lohiana dekenai idia hamaoroa, idia gwau, Oiemu natuna ia mase vadaeni. Badina dahaka hadibaia tauna dekenai oi noinoi noho? 36 To edia hereva Iesu ia kamoni neganai, ia hereva dubu lohiana dekenai, ia gwau, Oi gari lasi, oi abidadama henia mo. 37 Hutuma dekenai ia gwau, Umui noho, Petro mai Iakobo mai ena tadikaka Ioane sibona mo idia mai lau danu. 38 Idia lao, dubu lohiana ena ruma idia ginidae, unuseni ia itaia taunimanima momo idia taitai bada bona lalohisihisi regena karaia. 39 Ia raka vareai, ia nanadaia, Badina dahaka umui boiboi bona tai momo? Kekeni ia mase lasi, ia mahuta. 40 Idia kiri ia dekenai, to idia ibounai ia lulua murimuri ai. Unai kekeni ena tamana mai sinana bona iena bamona taudia sibona ia hakaua lao kekeni ia hekure gabunai. 41 Ia ese kekeni ena imana ia abia, ia hereva henia, ia gwau, Talita kumi, (anina be, "Kekeni e, oi toreisi"). 42 Nega tamona unai mase kekeni mauri ia davaria lou, ia toreisi bona ia raka. Iena lagani be 12. Ibounai idia hoa dikadika. 43 Ia ese sisiba goada ia henia idia dekenai, inai kara idia hamaoroa lasi taudia haida dekenai. Bona ia hereva aniani sisina kekeni dekenai idia henia, ia ania.

KAROA 6

Iesu ia lao Nasaret hanua dekenai

1 Unai gabu ia rakatania, ia lao iena hanua korikori dekenai. Iena diba tahua taudia ia danu idia lao. 2 Dina Helaga neganai dubu lalonai ia hadibaia, idia kamonaia, taunimanima momo idia hoa bada, idia gwau, Inai tau ese inai gau edeseni ia davaria? Inai be dahaka aonega ia abia? Daika ese ia henia ia dekenai? Bona inai siahu karadia be edana bamona ia karaia? 3 Inai be kapenta tauna, a? Maria ena natuna, Iakobo mai Iose mai Iuda mai Simona edia kakadia, a? Iena taihuna idia danu ita dekenai idia noho, a? Edia laloa be taina dika ia dekenai. 4 Iesu ia hereva idia dekenai, ia gwau, Taunimanima haida idia laloa peroveta tauna be tau badana, to iena hanua korikori, iena iduhu bona ena ruma taudia idia laloa ia be tau badana

lasi. 5 Unai gabu dekenai siahu karadia ia karaia diba lasi, to gorere taudia tamona tamona mo latanai iena imana ia atoa, ia hamauria. 6 Ia hoa bada, idia/edia abidadama lasi kara dekenai.

Iesu ese ena aposetolo ia siaia

Gabeai ia lao hanua maragi ibounai dekenai, ia hadibaia karaia. 7 Bona iena taudia 12 ia boiria, idia mai ia dekenai, bona rua rua amo ia siaia lao. Lauma dikadia lulua siahu ia henia idia dekenai. 8 Ia hadibaia, laolao gaudia idia abia lao lasi, raka durua au sibona, puse lasi, aniani lasi, moni lasi. 9 Tamaka idia atoa, to dabua rua idia atoa lasi. 10 Ia hamaoroa, Ruma ta umui daekau neganai, unuseni umui noho ela bona unai hanua umui rakatania. 11 Bema gabu haida dekenai idia ura lasi umui bona emui hereva idia kamoni lasi, umui rakatania neganai, emui aena kahu negea oho, edia kara dika hedinaraiia totona. 12 Vadaeni, idia lao, idia haroro, edia haroro anina be, taunimanima idia helalo kerehai. 13 Idia ese danu lauma dikadia momo idia lulua murimuri ai, bona gorere taudia momo latanai oila idia atoa, idia namo lou.

Ioane Bapatiso ia mase

14 King Herod ese kiki inai bamona ia kamoni, badina be Iesu ena kara namo sivarai taunimanima momo idia diba. Haida idia gwau, Inai be Ioane Bapatiso, mase dekena amo ia toreisi, bona siahu karadia idia vara iena lalonai. 15 To haida idia gwau, Inai be Elia, haida idia gwau, Inai be peroveta tauna ta, peroveta gunadia bamona. 16 To Herod, ia kamoni neganai, ia gwau, Inai be Ioane, guna ena kwarana lau utua oho, to hari mase dekena amo ia toreisi.

17 Badina be guna Herod, ena taudia haida ia siaia lao, Ioane idia dogoatao, dibura ruma lalonai idia atoa. Inai be Herodia ena ura, Herodia be Herod ena kakana Filipino ena adavana, to Herod ia headava ia. 18 Guna Ioane ese Herod ia gwau henia, ia gwau, Taravatu be, oiemu kakana ena adavana oi headava lasi. 19 Unai dainai Herodia ia badu Ioane dekenai, ia ura ia alaia mase, to dala be lasi,

20 badina be Herod ia gari Ioane dekenai. Ia gari badina be ia diba Ioane be kara maoromaoro tauna, bona helaga tauna, bona Herod ese Ioane ia naria namonamo. Nega momo Ioane ena hereva ia kamoni, bona ia daradara momo, to ia ura dikadika ia kamonia.

21 Herod ena vara laloatao dinana ia ginidae neganai aria badana ia karaia, hanua lohiadia bona tuari lohiadia bona Galilea kahana tau badadia idia mai. Vadaeni, inai be Herodia ena nega namona. 22 Herodia ena natuna kekeni ia raka vareai, ia mavaru, Herod mai ena vadivadi taudia idia moale bada. King ese kekeni dekenai ia hereva, ia gwau, Oiemu ura oi gwauraia, dohore lau henia oi dekenai. 23 Ia promisi metauna karaia, ia gwau, Dahaka gau oi noinoi lau dekenai dohore lau henia oi dekenai. Bema lauegu gavamani kahana oi noia danu lau do henia oi dekenai. 24 Kekeni ia lao murimuri ai, sinana ia nana-daia, ia gwau, Dahaka lau noinoi? Ia gwau, Ioane Bapatiso ena kwarana. 25 Karaharaga ia raka vareai lou king dekenai, ia noia, ia gwau, Lauegu ura be harihari Ioane Bapatiso ena kwarana oi henia lau dekenai mereki latanai. 26 King ena lalona ia hisihisi bada, to iena promisi metauna dainai bona ena vadivadi taudia dainai, inai noinoi koua dala ia diba lasi. 27 King ese ena tuari tauna ta ia siaia, ia hamaoroa Ioane Bapatiso ena kwarana ia mailaia. Ia lao dibura lalonai, Ioane Bapatiso ena kwarana ia utua oho. 28 Ia ena kwarana mereki latanai ia mailaia, kekeni dekenai ia henia. Gabeai kekeni ese sinana dekenai ia henia.

29 Ioane ena diba tahua taudia sivarai idia kamoni neganai, idia mai, iena tau anina idia laohaia, gara gabuna lalonai idia atoa.

Aposetolo taudia idia mai lou

30 Aposetolo taudia idia hebou lou Iesu dekenai, idia edia karaia gaudia bona hadibaia gaudia idia hamaoroa. 31 Ia hereva idia dekenai, ia gwau, Umui mai, taunimanima noho lasi gabuna ita lao, ita sipele sisina. Hutuma be hanai-hanai idia mai, idia lao, inai dekenai ia bona ena taudia be nega lasi idia aniani. 32 Idia guia vanagi dekenai, taunimanima noho lasi gabuna dekenai idia lao. 33 To idia lao nega-



Mamoe

nai, taunimanima momo ese idia itaia. Vadaeni hanua ibounai dekenai amo aena dekenai idia heau lao, idia ginidae guna. 34 Iesu ia ginidae, hutuma ia itaia neganai ia bogahisihisi idia dekenai badina idia be mamoe hegeregere, bona naria tauna lasi. Vadaeni, ia ese mauri sivarai momo ia hadibaia.

Iesu ese taudia 5000 ia ubua

35 Kahira-kahira dina ia diho, iena diba tahua taudia idia lao ia dekenai, idia gwau, Inai be aniani lasi gabuna, hanuaboi be kahira-kahira ia mai. 36 Hutuma oi siaia lao namo, idia lao uma bona hanua maragidia, aniani haida idia hoia, idia ania. 37 Ia haere henia, ia gwau, Umui sibona ese aniani umui henia idia dekenai. Idia gwau, Edana bamona? Paoni 20 ai abia, paraoa ai hoia, bona henia idia dekenai, idia ania, a? 38 Ia nanadaia, ia gwau, Umui emui aniani gaudia hida? Umui lao itaia. Idia tahua, gabeai idia gwau, Paraoa 5, bona gwarume rua sibona. 39 Ia ese taunimanima ibounai ia hamaoroa rei matamata gabuna idia helai diho. 40 Idia helai diho, haida 100 amo, haida 50 amo. 41 Aniani gaudia paraoa 5 bona gwarume rua ia abia, matana ia negea gubai, ia guriguri, Dirava dekenai ia tanikiu, gabeai paraoa ia makohia, diba tahua taudia dekenai ia henia, idia henia taunimanima dekenai. Gwarume danu ia makohia bona ia henia taunimanima ta ta dekenai. 42 Idia ibounai idia aniani, idia boga kunu. 43 Gabeai idia ania lasi paraoa bona gwarume idia haboua. bosea 12 idia hahonua. 44 Paraoa ania taudia be 5000.

Iesu davara kopina latanai ia raka

45 Iena diba tahua taudia ia hamaoroa, vanagi dekenai idia guia, idia hanaia lao guna Betesaida hanua kahanai, ia sibona noho, hutuma ia siaia lao. 46 Ia siaia lao murinai ia daekau ororo dekenai, ia guriguri. 47 Adorahi neganai vanagi be davara huanai, to ia sibona tano dekenai ia noho. 48 Ia itaia, idia bara hekwarahi bada, badina lai be idia vaira dekenai ia mai. Bona hanuaboi daba kahana, idia dekena davara kopina latanai ia raka lao. Ia ura vanagi ia hanaia. 49 Idia itaia davara kopina latanai ia raka neganai idia laloa ia be lauma ta, bona idia boiboi dikadika. 50 Badina be ibounai idia itaia, bona idia gari dikadika. To karaharaga ia hereva idia dekenai, ia gwau, Umui goada abia, umui gari lasi, inai be lau. 51 Ia lao idia dekena, vanagi dekenai ia guia, nega tamona lai ia doko vadaeni, idia hoa bada. 52 Badina be paraoa hoa kara anina idia diba namonamo lasi, edia laloa be koua.

Genesaret dekenai

53 Davara idia hanaia, idia kamokau Genesaret kone dekenai. 54 Vanagi dekena amo idia diho neganai, nega tamona taunimanima idia itaia ia be Iesu. 55 Bona unai kahana taudia ibounai idia heau lao, idia gorere taudia edia gedā latanai idia abia lao Iesu ena noho gabunai. 56 Bona edana gabu ia lao, hanua maragidia, hanua bada-dia, bona uma gabudia, dala dekenai gorere taudia idia atoa. Gorere taudia idia noinoi iena dabua dokona idia dogoatao, bona dogoatao taudia ibounai mauri idia davaria.

*KAROA 7**Iesu ese Farisea edia anina lasi taravatudia ia herevalaia*

1 Farisea taudia bona itorena taudia haida Ierusalem dekena amo idia mai, ia dekenai idia hebou. 2 Idia ese iena diba tahua taudia haida idia itaia, imadia mai miro danu aniani idia ania, imadia idia huria lasi. 3 Badina be Farisea bona Iuda taudia aniani idia ania neganai, imadia idia huria namonamo guna. Inai be edia sene taudia edia taravatu. 4 Hoihoi gabuna dekena amo idia mai, bema

idia digu lasi guna, idia aniani lasi. Taravatu momo inai bamona idia naria, kapusi, sosipani, aniani udaia gaudia huria taravatu. 5 Farisea taudia bona itorena taudia ese idia nanadaia, Badina dahaka oiemu diba tahua taudia ese sene taudia edia taravatu idia naria lasi, aniani idia ania imadia mai miro danu? 6 Ia hereva idia dekenai, ia gwau, Umui be koikoi taudia, Isaia ese emui kara ia hedinaraiia vadaeni. Ia torea inai bamona, "Inai bese taudia edia uduna sibona idia hanamoa lau, to edia lalodia be daudau masemase. 7 Idia toma diho lau dekenai, to anina lasi. Idia edia hadibaia hereva be taunimanima edia taravatu mo." 8 Umui Dirava ena taravatu umui rakatania vadaeni, bona taunimanima edia taravatu mo umui dogoatao noho.

9 Ia gwau henia, ia gwau, Momokani umui Dirava ena taravatu umui negea, emui sene taravatu umui dogoatao totona. 10 Mose ia gwau, "Oiemu tamana bona sinana oi hanamoa," inai danu, "Tamana sinana ia hadikaia tauna, umui alaia mase." 11 To umui gwau tau ta ese iena tamana o sinana dekenai ia hamaoroa, "Lauegu hanamoa gauna umui dekenai lau henia lasi, badina ia be Kobana" (anina be Dirava dekenai ia atoa vadaeni). 12 Inai dala dekenai umui gwau iena tamana bona sinana ia durua lasi be namo. 13 Inai bamona dala umui emui taravatu dekenai Dirava ena hereva umui hadikaia, taunimanima danu umui hadibaia inai bamona. Kara momo unai bamona umui karaia danu.

14 Hutuma ia boiria idia mai lou ia dekenai, ia hereva henia, ia gwau, Umui ibounai lauegu hereva kamoni namonamo, bona diba. 15 Murimuri ai gauna ia vareai tau lalonai ese unai tau ia hadikaia lasi, to lalona dekena amo mai gauna ese ia hadikaia. 16 Mai taiana tauna, namo ia kamoni.

17 Hutuma ia rakatania, bona ruma ia raka vareai neganai, iena diba tahua taudia iena parabole anina idia nanadaia. 18 Ia hereva idia dekenai, ia gwau, Umui danu inai hereva anina umui diba lasi, a? Murimuri dekenai noho gauna ia vareai tau lalonai be unai tau ia hadikaia lasi. Inai umui diba lasi, a? 19 Badina be unai tau ena lalona ia vareai lasi, to ia lao boganai sibona, bona inai

murinai ia lao negea gabuna, a? Unai hereva dekenai aniani gaudia ibounai ia gwauraia idia goeva. 20 Ia hereva lou, ia gwau, Taunimanima lalona dekena amo daekau gaudia ese taunimanima idia hadikaia. 21 Badina be lalona dekena amo, taunimanima lalona dekena amo daekau gaudia be, laloa dikadia, kekeni sihari kara, henaoa kara, taunimanima alaia kara, heudahanai kara, 22 tanobada gaudia ura dikadika kara, gagevagageva kara, koikoi kara, lebulebu mai matabodaga kara, mata dika kara, tau ta ena ladana hadikaia kava kara, hekokoroku kara, bona Dirava ura lasi kara. 23 Inai gau dikadia ibounai lalona dekena amo idia mai neganai taunimanima idia hamiroa bona hadikaia.

Turo bona Sidono dekenai

24 Unai gabu ia rakatania, ia lao Turo bona Sidono kahanai. Ia vareai ruma ta, ia ura taunimanima ta diba lasi, to ena hunia dala be lasi. 25 Hahine ta ena natuna kekeni maragina be mai lauma dikana danu. Iesu ena kara sivarai ia kamoni, maoromaoro ia mai, ia diho Iesu ena aena badinai. 26 Inai hahine be Helene hahinena, iena bese be Suro-Fenise. Ia noinoi Iesu dekenai, natuna lalonai noho lauma dikana ia lulua oho. 27 Iesu ia gwau, Maragidia idia boga kunu guna be namo, edia aniani henia sisia dekenai be dika. 28 Hahine ia haere henia, ia gwau, Lohiabada e, momokani, to sisia be pata henunai maragidia edia aniani momoru idia ania. 29 Hahine dekenai ia hereva henia, Inai hereva dainai oi lao, lauma dikana ese oiemu natuna ia rakatania vadaeni. 30 Ia lou ena ruma dekenai, kekeni ia davaria mahuta patanai ia hekure, lauma dikana ia rakatania vadaeni.

Hanua Gwauta kahana dekenai

31 Turo tanona ia rakatania, Sidono tanona bona Hanua Gwauta tanona ia raka hanaia, Galilea davara dekenai ia ginidae. 32 Idia ese taia kudima bona hereva diba lasi

32 taia kudima = kamoni diba lasi, taiana ia dika dainai.

26 Helene = tano ta, Iuda ena uest kahanai.

tauna idia hakaua lao ia dekenai. Idia noia iena imana ia atoa ia latanai. 33 Hutuma dekena amo Iesu ese ia hakaua siri idau gabu dekenai, bena ena ima kwakikwakina taiana lalonai ia atoa, bona Iesu ia kanudi bona tau ena malana dekenai iena ima kwakikwakina ia atoa. 34 Iena matana ia negea gubai, ia noinoi, gabeai ia gwau, Efata, hereva anina be, Oi kehoa. 35 Taiana ia kehoa vadaeni, malana ia ruhaia, bona ia hereva namonamo. 36 Iesu idia dekenai ia hamaoroa, tau ta idia hamaoroa lasi, to idia kamonai lasi, idia lao, sivarai idia kiki karaia momo. 37 Idia hoa bada, idia gwau, Gau ibounai ia karaia namo herea, taia kudima tauna ena taiana ia kehoa, hereva diba lasi tauna ena malana ia hanamo.

KARAO 8

Iesu ese taunimanima 4000 ia ubua

1 Unai neganai hutuma bada idia hebou lou, edia aniani be lasi. Iesu ena diba tahua taudia ia boiria, idia dekenai ia hereva, ia gwau, 2 Lau bogahisihisi hutuma dekenai badina dina toi lau dekenai idia noho, idia be aniani lasi. 3 Bema lau siaia lao, idia lao mai hitolo danu, sedira dala dekenai idia moru, hitolo dainai, badina haida be daudau gabuna dekena amo idia mai. 4 Iena diba tahua taudia idia haere henia, idia gwau, Inai be aniani lasi gabuna, bona hoihoi lasi gabuna, edana bamona aniani ita henia idia dekenai? 5 Ia nanadaia idia dekenai, ia gwau, Umui emui aniani gaudia be hida? Idia gwau, 7. 6 Gabeai hutuma dekenai ia hamaoroa, tano dekenai idia helai diho. Bona paraoa 7 ia abia, ia tanikiu henia, bona ia makohia, ena diba tahua taudia dekenai ia henia, idia henia taunimanima dekenai. 7 Edia gwarume maragidia haida idia noho, Dirava dekenai ia tanikiu henia, gabeai ia gwau, idia danu hutuma dekenai idia henia. 8 Ibounai idia ania, idia boga kunu. Gabeai idia ania lasi gaudia idia haboua. Bosea 7 idia hahonua. 9 Idia be taunimanima 4000 bamona. Ia siaia idia lao. 10 Unai murinai ia bona ena diba tahua taudia vanagi dekenai idia gua, idia lao Dalmanuta kahana dekenai.

Dalmanuta dekenai


11 Farisea taudia idia mai, ia danu idia herevahereva, idia ura toana ta guba dekena amo ia hedinarai. Idia ura diba iena siahu be ia bada o lasi. 12 Iena lalona ia hisi-hisi, ia gwau, Inai taudia be dahaka dainai toana ta idia tahua? Momokani lau hamaoroa umui, toa ta inai taudia idia do abia lasi. 13 Ia rakatania, vanagi dekenai ia guia lou, idau kahanai ia heau lao.

14 Diba tahua taudia aniani idia mailaia lasi, idia laloa-boio, vanagi dekenai paraoa tamona mo ia noho. 15 Ia sisiba goada henia idia dekenai, ia gwau, Umui naria namonamo, Farisea taudia bona Herod ena paraoa hatubua gauna umui abia garina. 16 Idia sibona herevahereva, Aniani ita mailaia lasi dainai inai bamona ia hereva. 17 Iesu ese idia edia laloa ia diba vadaeni, ia gwau henia, ia gwau, Badina dahaka umui herevahereva aniani lasi dainai? Umui diba lasi bona laloa namonamo lasi, a? Umui emui lalona be ia koua noho, a? 18 Mai matana rua umui noho, to umui itaia lasi, a? Mai taiana rua umui noho, to umui kamoni lasi, a? Umui laloatao lasi, a? 19 Paraoa 5 lau makohia bona 5000 dekenai lau henia neganai, ania lasi gaudia dekenai bosea hida umui hahonua? Idia gwau, 12. 20 Paraoa 7 lau makohia bona 4000 dekenai lau henia neganai, ania lasi gaudia dekenai bosea hida umui hahonua? Idia gwau, 7. 21 Ia hereva henia, ia gwau, Anina umui diba lasi, a?

Betesaida dekenai

22 Betesaida hanua dekenai idia ginidae. Taunimania ese matakepulu tauna ta idia hakaua lao ia dekena, idia noia iena imana ia atoa ia latanai. 23 Ia ese matakepulu tauna ena imana ia abia, ia hakaua lao hanua murimuri dekenai, matana dekenai ia kanudi, imana ia latanai ia atoa, ia nanadaia, ia gwau, Oi itaia dahaka? 24 Matakepulu tauna ese matana ia negea bona ia gwau, Lau itaia taunimania, idia be au bamona, idia laloa. 25 Iesu ese ena imana ia atoa lou matana dekenai, Iena matana ia

MAREKO



IESU IA LOALOA GABUDIA EDIA LAULAU

negea lou namonamo, vadaeni ia namo lou, bona gau ibounai ia itaia namonamo. 26 Iesu ia siaia lao ena ruma dekenai, ia gwau, Hanua taudia ta oi hamaoroa lasi.

Petro ese Iesu ena ladana ia gwauraia Keriso

27 Iesu mai ena diba tahua taudia danu idia lao Kaisarea Filipi kahana hanuadia dekenai. Dala dekenai idia raka neganai ena diba tahua taudia dekenai ia nanadaia, ia gwau, Taunimanima idia gwau lau be daika? 28 Idia haere henia, idia gwau, Ioane Bapatiso, to haida idia gwau Elia, bona haida idia gwau peroveta tauna ta. 29 Ia nanadaia lou, ia gwau, Umui lalao, lau be daika? Petro ia haere henia, ia gwau, Oi be Keriso. 30 Ia hamaoroa inai hereva idia gwauraia lasi, bona tau ta idia hamaoroa lasi.

31 Ia hadibaia, ia gwau, Taunimanima Natuna hisihisi momo ia do abia, hanua tau badadia, dubu biagudia, bona itorena taudia ese dohore idia hadikaia, idia do alaia mase, dina toi murinai ia do toresi lou. 32 Inai hereva ia hedinarai namonamo. Vadaeni, Petro ese ia hakaua siri, ia gwau henia hamatamaia. 33 To Iesu ia giroa, iena diba tahua taudia ia itaia, Petro dekenai ia gwau henia, ia gwau, Satana e, oi lao, Dirava bamona oi lalao lasi, taunimanima bamona mo oi lalao.

Mauri davaria dalana

34 Hutuma ia boiria, mai ena diba tahua taudia danu, ia hereva henia, ia gwau, Bema tau ta ia ura lauegu murinai ia raka, ia sibona kopina ena namo ia lalao lasi, iena satauro ia abia isi, bona lauegu murinai ia mai. 35 Badina be ia sibona ena mauri dogoatao tauna, iena mauri dohore ia halusia, to ena mauri halusia lau dainai bona sivarai namo dainai tauna, iena mauri do ia davaria. 36 Tau ta tanobada idoinai ia abia to iena mauri halusia, dahaka namo dohore ia abia? 37 Tau ta be dahaka davana ia henia iena mauri hoia totona? 38 Bema tau ta lau dainai ia hemarai, o lauegu hereva dainai ia hemarai, inai heudahanai mai kara dika taunimanima vairanai, Taunimanima Natuna danu unai tau dekenai do ia hemarai, iena giroa mai neganai, Tamana ena sياهو mai aneru helagadia danu.

KARAO 9

1 Ia hereva henia, ia gwau, Momokani lau hamaoroa umui, haida idia gini iniseni, idia do mase lasi ela bona Dirava ena basileia idia itaia guna, mai siahu danu ia mai.

Iesu idia itaia, ia be idau

2 Dina 6 ia ore neganai, Iesu ese Petro mai Iakobo mai Ioane ia hakaua, idia daekau ororo badana dekenai, iena tau anina idia itaia be ia idau. 3 Iena dabua ia diaridiari kurokuro bada herea, tanobada dabua huria tauna ta ese ia hakurokuroa diba lasi unai bamona. 4 Idia itaia, Elia bona Mose idia hedinarai, Iesu danu idia herevahereva. 5 Petro ese Iesu dekenai ia hereva, ia gwau, Hadibaia tauna e, namo ita noho iniseni, oi ura palai ruma toi ai haginia, oiemu ta, Mose ena ta, bona Elia ena ta? 6 Ia hereva namonamo diba lasi, badina idia gari dikadika. 7 Ori ta ia koua idia dekenai, bona gado ta ori lalona dekena amo ia mai, ia gwau, Inai be lauegu Natuna. Lau lalokau henia, umui kamoni henia. 8 Karaharaga unai gabu ibounai idia itaia namonamo, to tau ta idia itaia lasi, Iesu sibona mo idia danu.

9 Ororo dekena amo idia diho mai neganai ia hamaoroa inai idia itaia gaudia idia gwauria lasi, ela bona Taunimanima Natuna mase dekena amo ia toreisi lou. 10 Inai hereva idia sibona laloa, idia sibona idia herevahereva, Inai mase dekena amo toreisi lou herevana be dahaka? 11 Idia nanadaia ia dekenai, idia gwau, Badina dahaka itorena taudia idia gwau, Elia do ia mai guna? 12 Ia haere henia, ia gwau, Momokani Elia ia mai guna, gau ibounai ia hanamoa guna totona, bona Buka Helaga edana bamona Taunimanima Natuna herevana ia torea, "Hisihisi momo do ia abia, bona idia do hahemaraia?" 13 To lau hamaoroa umui, Elia ia mai vadaeni, bona dahaka idia ura gaudia idia karaia vadaeni ia dekenai, Buka Helaga ia torea bamona.

Iesu ese gorere mero ta ia hanamoa

14 Diba tahua taudia dekenai idia ginidae neganai, idia

itaia idia be hutuma bada lalonai. Itorena taudia danu idia hepapahuahu. 15 Hutuma ibounai Iesu idia itaia, idia hoa bada, idia heau lao ia dekenai, idia hanamoa. 16 Ia nana-daia, Umui dahaka dekenai herevahereva noho idia danu? 17 Hutuma lalonai tau ta ia haere henia, ia gwau, Hadibaia tauna e, oi dekenai lauegu natuna lau mailaia, ia be hereva diba lasi lauma ese ia abia. 18 Ia dogoatao gabuna dekenai ia negea diho, uduna ranu kurokuro ia diho mai, isena sibona ia koria dikadika, bona ena kopina ia maragi vadaeni. Oiemu diba tahua taudia lau noia lauma dika idia lulua, to idia hegeregere lasi. 19 Ia haere henia, ia gwau, O, abidadama lasi taudia, dina hida umui dekenai dohore lau noho? Dina hida lau gaukara umui danu? Mailaia lau dekenai. 20 Idia ese mero idia abia lao ia dekenai, lauma ese Iesu ia itaia neganai nega tamona ia dagedage herea bona mero ia hamorua diho tano dekenai, tano ia botaia, uduna ranu kurokuro ia diho mai. 21 Iesu ese mero ena tamana dekenai ia nanadaia, Edana negai inai gorere ia davaria? Ia gwau, Ia maragina neganai. 22 Nega momo ia negea lahi lalonai, ranu lalonai danu, hadikaia totona, to bema oi karaia diba, mani oi bogahisi-hisi ai dekenai bona oi durua ai. 23 Iesu ia gwau, dahaka oi gwau, Bema oi karaia diba! Abidadama tauna gau ibounai ia karaia diba. 24 Bona karaharaga mero ena tamana ia boiboi, ia noia, Lau abidadama henia, lauegu abidadama maragi-maragi mani oi durua. 25 Iesu ese hutuma ia itaia idia heau mai ia dekena, vadaeni unai lauma dikana dekenai ia gwau henia, ia gwau, Oi hereva diba lasi bona taia koua lauma, oi lao murimuri, ia lalonai oi vareai lou lasi. 26 Vadaeni, ia boiboi goada, bona ia ese mero ia hamarerea dikadika, bona ia lao murimuri ai. Mero be mase tauna bamona, hutuma idia gwau ia mase momokani. 27 To Iesu ese iena imana ia dogoatao, ia abia isi, ia toreisi vadaeni.

28 Ruma lalonai ia raka vareai, iena diba tahua taudia idia nanadaia, idia gwau, Badina dahaka aiemai lulua siahua be hegeregere lasi? 29 Idia dekenai ia gwau, Inai bamona gauna lulua dala ta be lasi, guriguri sibona mo be hegeregere.

30 Unai gabu ia rakanania, Galilea tanona ia raka hanaia, ia ura taunimanima idia diba lasi ia lao, 31 badina be iena diba tahua taudia dekenai ia hadibaia, ia gwau, Taunimanima Natuna be taunimanima ese dohore idia dogoatao, idia alaia mase, bona dina toi murinai ia do toreisi lou. 32 Unai hereva anina idia diba lasi, to idia gari dekenai idia nanadaia lasi.

Kaperanaum hanua dekenai

33 Idia ginidae Kaperanaum hanua dekenai, ruma lalonai idia dekenai ia nanadaia, ia gwau, Dala dekenai dahaka umui herevahereva? 34 Idia hereva lasi, badina dala dekenai idia sibona idia herevahereva daika be dohore ia tau bada herea. 35 Ia helai diho, iena taudia 12 ia boiria, ia gwau, Bema tau ta ena ura be ia gini, gunalaia tauna o biaguna, unai tau dohore ia lao gabeai, bona ia be dohore taunimanima ibounai edia hesiai tauna. 36 Ia ese mero maragi ta ia abia, idia huanai ia haginia, bona ia rosia. Ia hereva, 37 Daika ese natuna maragi inai bamona ia abiadae lauegu ladana dainai, be lau danu ia abia. Bema tau ta ia abia lau, lau sibona ia abia lasi, to lau ia siaia Tauna danu ia abia.

38 Ioane ese ia hamaoroa, Hadibaia tauna e, tau ta ai itaia oiemu ladana dekenai lauma dikadia ia lulua, to ia be iseda kahana tauna lasi. Unai dainai iena gaukara ai hadokoa, badina be ia be iseda kahana tauna lasi. 39 To Iesu ia gwau, Hadokoa lasi, badina bema tau ta siahu kara lauegu ladana dekenai ia karaia, be nega sisina gabeai hereva dika dekenai lauegu ladana ia hadikaia diba lasi. 40 Daika ia ura lasi hadikaia ita, ia be iseda kahana durua tauna. 41 Daika ranu taina ia henia umui dekenai lau dainai, badina umui be Keriso ena, momokani lau hamaoroa umui, unai tau ese davana namona ia do halusia lasi. 42 Bema tau ta, lau dekenai abidadama henia mero maragi ta ia hakererea, unai tau ena aiona dekenai nadi badana idia kwatua, bona unai tau idia negea diho davara dekenai be ia namo.

43 Bema oiemu imana karadika ia karaia, oi utua negea, namo oi be imana tamona tauna bona mauri oi davaria.

Badina ia namo lasi oiemu imana rua idia noho to oi vareai lao hel dekenai, lahi habodoa diba lasi gabuna. 44 Unai gabuna dekenai gaigai maragi idia mase lasi, lahi danu ia bodo lasi. 45 Bema oiemu aena karadika ia karaia, oi utua negea, namo oi be aena tamona tauna bona mauri oi davaria. Badina ia namo lasi oiemu aena rua idia noho to oi vareai lao hel dekenai. 46 Unai gabuna dekenai gaigai maragi idia mase lasi, lahi danu ia bodo lasi. 47 Bema oiemu matana karadika ia karaia, oi kokia, namo oi be matana tamona tauna bona oi vareai lao Dirava ena basileia dekenai. Badina ia namo lasi oiemu matana rua idia noho to oi vareai lao hel dekenai. 48 Unai gabuna dekenai gaigai maragi idia mase lasi, lahi danu ia bodo lasi.

49 Lahi ese taunimanima ibounai ia do hagoevaia. 50 Damena be gau namona, to bema damena be mamina lasi, edana bamona ena mamina oi abia lou? Umui lalonai damena umui abia bona maino dekenai umui noho hebou.

KAROA 10

Ioridane unai kahana dekenai

1 Ia toreisi, ia lao Iudea kahanai bona Ioridane unai kahanai, hutuma idia hebou lou ia dekenai, ia hadibaia lou, nega idoinai ia karaia bamona. 2 Farisea taudia idia mai ia dekenai, idia ura koia, idia nanadaia, Tau ta ena adavana ia negea kara be ia maoro o maoro lasi? 3 Ia haere henia, ia gwau, Dahaka taravatu Mose ia henia umui dekenai? 4 Idia gwau, Mose ena taravatu be, headava hadokoa pepana tau ta ia torea, ena hahine dekenai ia henia, vadaeni ia negea. 5 To Iesu ia hereva ia dekenai, ia gwau, Umui emui lalona auka dainai Mose inai taravatu ia henia umui dekenai. 6 To gunaguna Dirava ese tano-bada ia karaia neganai, ia ese taunimanima ia karaia, tau bona hahine. 7 Unai dainai tau ta iena tamana sinana ia rakatania, ia lao adavana danu idia noho hebou. 8 Hari idia raruosi tau anina be tamona. Unai dainai idia be rua lasi, to tamona mo. 9 Dirava ese ia haboua, vadaeni, taunimanima idia hamakohia be mai taravatu.

10 Idia mai lou rumai neganai iena diba tahua taudia unai hereva anina idia tahua. 11 Ia hamaoroa, Tau ta iena adavana ia negea bona hahine ta ia headava, unai be ia heudahanai karaia. 12 Hahine danu bema adavana ia negea, tau ta ia headava, unai be ia heudahanai karaia.


Iesu ese maragidia ia hanamoa

13 Natudia maragi idia mailaia ia dekenai, idia ura iena imana idia latanai ia atoa, to diba tahua taudia ese idia lulua. 14 To Iesu ia itaia, ia badu, ia gwau henia, ia gwau, Lau ura maragi idia mai lau dekenai, umui lulua lasi, badina idia bamona be Dirava ena basileia taudia. 15 Momokani lau hamaoroa umui, daika ese Dirava ena basileia natuna maragina bamona ia abiadae lasi, ia do vareai lasi unuseni. 16 Bona maragidia ia rosia, bona iena imana ia atoa idia latanai, ia hanamoa.

Mauri hanaihanai hereva

17 Dala dekenai ia raka neganai tau ta ia heau mai, ia tui diho Iesu vairanai, ia nanadaia, Hadibaia tauna namona e, dahaka lau karaia, lau mauri hanaihanai abia totona? 18 Iesu ia haere henia, ia gwau, Badina dahaka oi hereva lau be namo? Tau ta ia namo lasi, Dirava sibona mo. 19 Taravatu oi diba, "Oi tau ta alaia lasi, Oi heudahanai lasi, Oi henaio lasi, Oi samania koikoi lasi, Oi koikoi lasi, Oiemu tamana sinana oi hanamoa." 20 Inai tau ia haere henia, Hadibaia tauna e, lau mero neganai ia mai bona harihari, inai taravatu ibounai lau makohia lasi. 21 Iesu ia itaia mai moale danu, ia ura henia, ia gwau, Gau tamona oi karaia lasi, oi lao, oiemu kohu oi hoia, ogegami taudia dekenai oi henia, gabeai kohu namona oi do davaria guba dekenai, oi mai, lauegu murinai oi raka. 22 Unai hereva ia kamoni neganai iena vairana ia metau, ia raka oho mai lalo hisihisi danu, badina ia be kohu momo tauna.

23 Iesu ia giroa, ia ena diba tahua taudia dekenai ia hereva, ia gwau, Kohu momo taudia Dirava ena basileia idia vareai dala be mai hekwarahi bada! 24 Unai hereva dekenai diba tahua taudia idia hoa. Iesu ia hereva lou, Lauegu natudia,

*Kobi*

Dirava ena basileia vareai dala be auka! 25 Kamelo kobi matuna ia vareai be haraga to kohu momo tauna Dirava ena basileia vareai dala be auka. 26 Idia hoa bada inai hereva dekenai. Bona idia sibona dekenai idia herevahereva, Be! Daika mauri ia davaria diba? 27 Iesu ia itadia lou, ia gwau, Taunimanima idia karaia diba lasi, to Dirava ia diba, badina be Dirava ese gau ibounai ia karaia diba.

28 Petro ia laloa namonamo, ia gwau, Aiema! gau ibounai ai rakatania vadaeni, bona oiemu murinai ai raka. 29 Iesu ia gwau, Momokani lau hamaoroa umui, bema tau ta ena ruma ia rakatania, o iena tadikakana, o taihuna, o sinana, o tamana, o natuna, o tano. Bema lau dainai bona sivarai namo dainai inai gaudia ia rakatania, 30 hari inai mauri neganai, iena gau do ia habadaia nega 100 bamona, ruma, tadikakana, taihuna, sinana, natuna, tano, bona taunimanima idia do hahisihisia, bona gabeai, vaira neganai mauri hanaihanai ia do abia. 31 Taunimanima momo be tau badadia, to gabeai idia be tau maragidia, bona hutuma be hari idia tau maragidia, gabeai be idia do tau badadia.

Ierusalem dala dekenai

32 Ierusalem dala dekenai idia raka, Iesu ia lao guna sisina, idia hoa, ia murinai idia raka mai gari bada. Ia ese iena taudia 12 ia hakaua siri, gabeai ia dekenai do vara gaudia ibounai ia hamaoroa guna. 33 Ia gwau, Ita lao Ierusalem, unuseni tau ta ese Taunimanima Natuna ia do henia dubu biagudia bona itorena taudia dekenai. Idia do

gwau ia do mase, bona idia do henia idau bese taudia, alaia gwauraia. 34 Idia do hevaseha ia dekenai, idia do dadabaia, idia do kanudi henia, idia do alaia mase. Dina toi murinai ia do toreisi lou.

35 Sebedeo ena natudia, Iakobo mai Ioane ese idia hereva henia, idia gwau, Hadibaia tauna e, ai ura aiemai noinoi gauna oi henia ai dekenai. 36 Ia gwau, Umui ura dahaka lau karaia umui dekenai? 37 Idia gwau, Oiemu basileia oi abia neganai, ai ura oi badibadinai ai helai, ta idiba kahanai, ta lauri kahanai. 38 Iesu ia hereva idia dekenai, ia gwau, Umui diba lasi dahaka umui noinoi. Lau inua gauna umui danu inua diba a? Idia henia lau dekenai bapatiso, umui danu abia hegeregere? 39 Idia gwau, Ai abia diba. Iesu ia hereva idia dekenai, Dahaka lau inua umui danu do umui inua, bapatiso idia henia lau dekenai, idia do henia umui dekenai danu. 40 To lauegu idiba kahanai bona lauri kahanai helai gabudia lau sibona lau atoa lasi. Unai helai gabudia Dirava ese ia atoa hegaegae, bona ia sibona ia diba daika dekenai dohore ia henia.

41 Taudia 10 idia kamoni, idia badu Iakobo bona Ioane dekenai. 42 Iesu ia boiria idia mai ia dekenai, ia hereva henia, ia gwau, Umui diba, idau bese taudia edia lohia taudia hesiai gaukara idia karaia lasi, to idia hereva sibona, bona edia hereva gauna edia hesiai taudia idia kamoni bona karaia. 43 To umui be unai kara bamona karaia lasi, umui ta ia ura be tau bada herea gwauraia, be hesiai gaukara ia karaia umui dekenai. 44 Umui ta, ia ura be lohia tauna gwauraia, ia be umui ibounai dekenai hesiai gaukara ia karaia. 45 Badina Taunimanima Natuna ia mai lasi, hesiai taudia ese iena gaukara idia karaia totona, to ia mai be hesiai gaukara ia karaia totona, bona iena mauri ia henia taunimanima momo edia dika davana karaia totona.

Ieriko hanua dekenai


46 Idia ginidae Ieriko hanua dekenai. Ia mai ena diba tahua taudia mai hutuma bada Ieriko hanua idia rakatania neganai matakepulu tauna ladana Batimeo, Timeo ena natuna, noinoi tauna, ia helai dala badinai. 47 Ia kamoni

Iesu, Nasaret tauna, be ia raka kahira, ia boiboi goada, ia gwau, Iesu e, David ena natuna, mani oi bogahisihisi lau dekenai. 48 Hutuma idia badu ia boiboi dekenai, idia hamaoroa ia hereva lasi, to ia boiboi goada, ia gwau, David ena natuna e, oi bogahisihisi lau dekenai. 49 Iesu ia gini noho, ia gwau, Umui boiria ia mai. Idia ese matakepulu tauna idia boiria, idia hamaoroa, Oi gari lasi, oi toreisi, ia boiboi oi dekenai. 50 Ia iena dabua ia negea oho, ia toreisi haraga, ia lao Iesu dekena. 51 Iesu ese ia nanadaia, Oi ura dahaka lau karaia oi dekenai? Matakepulu tauna ia gwau, Hadibaia tauna e, lau ura lauegu matana oi kehoa. 52 Iesu ese ia hereva henia, Oi lao, oiemu abidadama dainai mauri oi davaria vadaeni. Nega tamona iena matana idia kehoa vadaeni, gabeai ia raka Iesu ena murinai.

KAROA 11

Iesu Ierusalem hanua dekenai ia lao

1 Idia mai Ierusalem kahira-kahira neganai, hanua rua Betefage bona Betania dekenai idia ginidae, Olive ororo badinai. Iena diba tahua taudia rua ia siaia. 2 Idia dekenai ia hereva, Umui lao vairana hanua dekenai, umui raka vareai, kwatua doniki natuna ta do umui itaia, tau ta ia latanai helai lasi guna, umui ruhaia, umui mailaia. 3 Bema tau ta ia hereva umui dekenai, ia gwau, "Dahaka umui karaia?" umui gwau, "Lohiabada ese ia ura abia, bona nega sisina ia do siaia lou iniseni." 4 Idia lao neganai doniki natuna idia davaria kwatua gabuna dekenai, vadaeni



idia ruhaia. 5 Unuseni gini taudia idia hereva, idia gwau, Badina dahaka doniki natuna umui ruhaia? 6 Iesu ena hereva gauna idia hamaoroa vadaeni, bona unuseni gini taudia idia hereva, Ia namo. 7 Idia ese doniki natuna idia hakaua lao Iesu dekena. Idia edia dabua doniki ena doruna dekenai idia atoa, vadaeni ia ese doniki latanai ia helai. 8 Hutuma edia dabua idia atoa dala latanai, haida be au raurau idia utua, dala latanai idia atoa. 9 Idia raka dala dekenai, ia vairanai bona murinai, idia boiboi goada, idia gwau, Hosana! Lohiabada ladanai ia mai tauna ita hanamo! 10 Iseda tamana David ena gavamani ia mai, ita hanamo! Hosana ia lao atai dekenai momokani!

Jerusalem hanua dekenai

11 Iesu Ierusalem hanua dekenai ia ginidae, Dubu Helaga lalonai ia raka vareai. Dubu lalonai gau ibounai ia itaia. Gabeai, hanuaboi be kahira-kahira dainai, ia mai ena taudia 12 danu idia lao lou Betania hanua dekenai.

12 Kerukeru Betania hanua idia rakatania neganai, ia hitolo. 13 Fig au ta sisina daudau ia itaia, mai raurau, ia lao anina abia totona, to anina ia davaria lasi, raurau sibona mo, badina inai au ena huahua atoa negana ia mai lasi. 14 Iesu inai au dekenai ia gwau henia, ia gwau, Oiemu huahua tau ta ia do ania lasi ela bona hanaihanai. Inai hereva iena diba tahua taudia idia kamoni vadaeni.

15 Idia mai Ierusalem dekenai, Iesu ia raka vareai Dubu Helaga lalonai, hoihoi taudia ia lulua murimuri dekenai. Moni idia senisi taudia edia pata ia negea diho bona pune idia hoia taudia edia helai gaudia ia bubua. 16 Dubu Helaga lalonai hanaia lao kohu huaia taudia edia kara ia koua. 17 Idia dekenai ia hadibaia, ia gwau, Buka Helaga lalonai inai bamona ia torea vadaeni, "Lauegu ruma be bese ibounai edia guriguri rumana gwauria?" To umui be henaia taudia edia noho ruma umui karaia vadaeni. 18 Dubu biagudia bona itorena taudia idia kamoni neganai Iesu alaia mase dala idia tahua namonamo, badina ia dekenai idia gari. Idia edia gari badina be taunimanima ibounai idia hoa bona ura bada iena hadibaia hereva dekenai.

13 fig = au huahua ta.

19 Hanuaboi kahira-kahira Iesu ese hanua badana ia rakanania.

20 Dabai, dala dekenai idia raka lou, guna ia ese gwau henia *fig* au idia itaia, idoinai mai ramuna danu ia kaukau vadaeni. 21 Petro ia laloa noho, vadaeni ia hereva ia dekenai, Hadibaia tauna e, oi itaia, oiemu hereva dekenai oi hadikaia *fig* au ia kaukau vadaeni. 22 Iesu ia haere henia, ia gwau, Dirava umui abidadama henia. 23 Momokani lau hamaoroa umui, tau ta inai ororo ia hamaoroa, ia gwau, "Oi toreisi, oi moru davara lalonai". Bema ia daradara lasi ena lalona dekenai, to ia abidadama henia iena gwauraia gauna do ia vara, iena hereva gauna do ia davaria momokani. 24 Unai dainai lau hamaoroa umui, dahaka gau umui ura, guriguri dekenai umui noia neganai, bema umui abidadama henia momokani umui do abia, vadaeni, umui do abia.

25 Umui guriguri gwauraia neganai, idia hadikaia umui taudia edia dika umui gwauatao. Unai neganai umui emui gubai noho Tamana ia ese umui emui dika ia do gwauatao. 26 To bema umui gwauatao lasi, umui emui gubai noho Tamana ia danu emui dika do ia gwauatao lasi.

Iesu Ierusalem hanua lohiadia danu idia hepapahuahu

27 Idia mai lou Ierusalem dekenai. Ia ese Dubu Helaga lalonai ia raka neganai dubu biagudia bona itorena taudia bona hanua tau badadia idia mai ia dekenai. 28 Idia nanadaia, Dahaka siahu dekenai inai kara oi karaia? Daika ese inai siahu ia henia oi dekenai, inai gaudia oi karaia gwauraia? 29 Iesu ia hereva idia dekenai, ia gwau, Lau danu hereva tamona lau nanadaia umui dekenai, bema umui haere lau dekenai, lau do hamaoroa daika ena siahu dekenai inai kara lau karaia. 30 Ioane ena bapatiso kara be guba dekena amo ia mai, o taunimanima dekena amo ia mai? 31 Idia sibona idia herevahereva, Dahaka ita gwau, Bema ita hereva, "Guba dekena amo ia mai," ia do gwau, "Badina dahaka umui abidadama henia lasi?" 32 Sedira ita gwau, "Taunimanima dekena amo ia mai", —to idia gari bada taunimanima dekenai, badina ibounai

idia gwau Ioane ia peroveta tauna momokani. 33 Idia haere henia Iesu dekenai, idia gwau, Ai diba lasi. Iesu ia hereva, Lau danu hamaoroa lasi daika ena siahu dekenai inai kara lau karaia.

KARAOA 12

Parabole—Uma naria taudia dikadia

1 Parabole ta ia hamaoroa idia dekenai, ia gwau, Tau ta vain uma ia hadoa, ara ia karaia, vain huahua moia gabuna ia geia, naria ruma ia karaia. Vadaeni, uma ia henia naria taudia dekenai, bena ia lao hanua daudau dekenai. 2 Huahua ia mage neganai, hesiai tauna ta ia siaia uma naria taudia dekenai, vain anina abia totona. 3 To idia ese hesiai tauna idia dogoatao, idia botiaia, gabeai idia siaia lou imana kavakava. 4 Hesiai tauna ta ma ia siaia, to idia haberoa kwarana dekenai, bona idia hahemaraia dikadika. 5 Ta ma ia siaia, to idia alaia mase, momo danu ia siaia, to idia ese haida idia botiaia, haida idia alaia mase. 6 Gabeai tamona mo ia noho, uma biaguna ena natuna, ia lalokau henia. Dokona neganai ia siaia lao idia dekenai, ia gwau, Ia be lauegu natuna dainai idia do kamoni henia. 7 To uma naria taudia idia herevahereva, idia gwau, Inai be dohore uma gabuna ia abia tauna, umui mai, ita alaia mase, dohore ita sibona uma gabuna ita abia. 8 Idia dogoatao, idia alaia mase, uma murimuri dekenai idia negea. 9 Vain uma biaguna dahaka do ia karaia? Ia do mai, uma naria taudia ia do alaia ore, vain uma gabuna idau taudia dekenai ia do henia.

10 Inai Buka Helaga hereva umui duahia lasi guna, a? “Ruma haginia taudia idia negea nadina, ia be dohore ruma ena goada badina nadina. 11 Inai kara Lohiabada ese ia karaia. Ita itaia, ita hoa”.

12 Vadaeni, idia ura ia idia dogoatao, to idia gari taunima-nima dekenai, badina be idia diba unai uma parabole ia gwaauraia idia dainai. Idia rakatania, idia raka oho.

1 Vain = au marngira ta, ena huahua ranu be inainu gauna.

Kaisara ena takis moni

13 Farisea taudia bona Herod ena kahana taudia haida idia siaia ia dekenai, idia ura koia, iena hereva dekenai idia samania totona. 14 Idia mai, idia hereva henia, Hadi-baia tauna e, ai diba oi hereva maoromaoro, oi gari lasi taunimanima dekenai. Oi laloa lasi daika tauna dekenai oi hereva, tau badana o tau maragina, to Dirava ena dala oi hadibaia hereva momokani dekenai. Takis moni ai henia Kaisara dekenai. ia namo o lasi? 15 Ai henia, o, ai henia lasi? Ia diba edia koikoi, ia gwau, Badina dahaka lau samania dala umui tahua? Shilling rua ta umui mailaia, lau itaia. 16 Idia mailaia. Ia nanadaia, ia gwau, Inai be daika ena laulau bona ladana? Idia gwau, Kaisara ena. 17 Iesu ia hereva idia dekenai, ia gwau, Kaisara ena gaudia umui henia Kaisara dekenai, Dirava ena gaudia umui henia Dirava dekenai. Ena hereva dekenai idia hoa bada.

Toreisi lou hereva

18 Sadukea taudia idia mai ia dekenai, idia laloa mase taudia do idia toreisi lou lasi. Idia nanadaia, 19 Hadibaia tauna e, Mose ese inai taravatu ia henia ai dekenai, "Tau ta ena kakana ia mase neganai, bema ena adavana ia mauri noho, to natuna be lasi, vadaeni mase tauna ena tadina ese vabu ia do headava, bona natuna ia do havaraia, idia be iena kakana ena gwauraia." 20 Tadikaka be 7, vara guna tauna hahine ta ia headava, gabeai ia mase, natuna be lasi. 21 Tau namba 2 ese vabu ia headava, ia danu mase, natuna lasi, tau namba 3 danu unai bamona. 22 Tadi-kaka 7 unai bamona, ibounai inai hahine tamona idia headava, idia mase, natudia be lasi. Gabeai hahine danu ia mase. 23 Toreisi lou neganai, ia be daika ena adavana, badina be tau 7 idia headava vadaeni? 24 Iesu ia hereva idia dekenai, ia gwau, Umui emui kerere be inai, Buka Helaga umui diba lasi, bona Dirava ena sياهو umui diba lasi, 25 Badina mase dekena amo toreisi lou taudia, idia headava lasi, idia be guba dekenai noho aneru bamona.

26 To mase taudia toreisi lou hereva Mose ena Buka lalonai umui duahia lasi, a? Au ginigini sivaraina lalonai,

18 Sadukea = Iuda edia dubu taudia haida, idia be lalo tamona lasi Farisea dekenai.

Dirava ese Mose dekenai ia hamaoroa, "Lau be Abraham ena Dirava, Isaak ena Dirava, Iakob ena Dirava." 27 Ia be mase taudia edia Dirava lasi, ia be mauri taudia edia. Unai dainai, umui be kerere bada.

Taravatu namba uan be lalokau

28 Itorena tauna ta ia mai, idia edia herevahereva ia kamonai, ia diba Iesu ia hereva maoromaoro idia dekenai, ia nanadaia, ia gwau, Taravatu ibounai dekenai, edana be taravatu badana? 29 Iesu ia haere henia, ia gwau, Gini-gunana be inai, "Israel taudia e, umui kamonai, Lohiabada iseda Dirava be Lohiabada tamona. 30 Lohiabada oiemu Dirava oi ura henia, mai oiemu lalona idoinai, mai oiemu lauma idoinai, mai oiemu aonega idoinai, mai oiemu goada idoinai." 31 Namba 2 be inai, "Oiemu dekena tauna oi ura henia, oi sibona oi ura henia bamona." Taravatu haida ese inai rua idia hanaia diba lasi. 32 Itorena tauna ia hereva henia, ia gwau, Hadibaia tauna e, oi hereva momokani, oiemu hereva be maoromaoro. Dirava ia tamona, ta lasi, ia sibona. 33 Ia dekenai ura henia mai lalona idoinai, mai aonega idoinai, mai goada idoinai, dekena tauna danu ura henia, ia sibona ura henia bamona, unai kara be boubou karadia ibounai ia hanaia. 34 Iesu ia diba ia hereva mai aonega danu, vadaeni ia hamaoroa, ia gwau, Oi bona Dirava ena basileia be daudau lasi. Unai murinai tau ta ia hegeregere lasi hereva ta nanadaia lou.

Iesu ese itorena taudia edia kara ia hedinarai

35 Dubu Helaga lalonai Iesu ia hadibaia neganai, ia gwau, Itorena taudia be dahaka idia gwaureia, Keriso be David ena natuna? 36 Lauma Helaga ena aonega dekenai David ia gwau, "Lohiabada ese lauegu Lohia ia hamaoroa, Oi lauegu idiba kahanai helai diho, ela bona oi dekenai tuari taudia lau atoa oiemu aena henunai." 37 David sibona iena ladana ia atoa be Lohiabada. Inai bamona

33 boubou = henia gauna Dirava dekenai.

neganai edana bamona ia be David ena natuna? Hutuma bada Iesu ena hereva idia kamonai mai moale danu.

38 Ena hadibaia hereva lalonai ia gwau, Itorena taudia umui naria namonamo, idia ura bada dabua lata, bona idia ura hoihoi gabudia dekenai taunimanima ese idia hanamo bona saluti idia dekenai, 39 bona dubu lalonai idia ura helai gaudia namodia dekenai idia helai, aria neganai danu inai bamona. 40 idia ese vabu edia rumadia idia henaoa, bona guriguri lata herea idia gwauraia koikoi. Inai taudia edia dika davana bada herea do idia davaria.

Vabu ena moni ia henia Dirava dekenai

41 Iesu ia helai moni udaia maua badinai, ia itaia taunimanima moni idia udaia, moni momo taudia hutuma idia mai, moni bada idia udaia. 42 Vabu ogogamina ta ia mai, moni maragimaragi rua ia udaia, hegeregere peni ta bamona. 43 Ia ena diba tahua taudia ia boiria, ia hamaoroa, Momokani lau hamaoroa umui, unai vabu ogogamina ese ia udaia moni be bada, idia ibounai udaia moni be maragi. 44 Badina be idia edia moni bada dekena amo sisina mo idia udaia. To inai vabu iena moni ibounai ia henia vadaeni, iena aniani hoia moni danu.

KAROA 13

Iesu ese gabeai idia do vara gaudia ia gwauraia guna

1 Dubu Helaga ia rakatania neganai, iena diba tahua tauna ta ia hereva henia, ia gwau, Hadibaia tauna e, oi itaia, inai nadi badadia bona ruma badadia be namo herea. 2 Iesu ia hereva ia dekenai, a gwau, Inai ruma badadia oi itaia, a? Nadi ta, nadi ta latanai do ia noho lasi, ibounai do idia be hamorua diho.

3 Ia helai Olive ororo dekenai, Dubu Helaga kahanai neganai, Petro, Iakobo, Ioane mai Andrea sibona ese idia nanadaia, 4 Mani oi hamaoroa ai dekenai, inai gau ibounai edana negai idia do vara? Idia do mai kahira-kahira toana be dahaka?

5 Iesu ia haere henia, ia gwau, Umui naria, tau ta ese ia umui hakaua kerere garina. 6 Badina taunimanima momo lauegu ladanai idia do mai, idia do gwau, "Lau be Keriso". Taunimanima momo idia do hakaua kerere.

7 Tuari sivarai umui do kamona, bona tuari hereva koikoi umui do kamona danu neganai, umui gari lasi. Badina inai gaudia idia do vara, to dokona be gabeai. 8 Badina bese idia do tuari bese dekenai, bona gavamani idia do tuari gavamani dekenai. Gabu momo tano do ia marere bada, hitolo bada negana danu do ia vara. Inai gaudia dekenai nega dikana do ia matamaia.

9 To umui sibona dekenai naria namonamo, badina be idia ese umui do idia hakaua lao kaunsil vairadiai, bona dubu lalodiai idia do dadabaia umui. Lau dainai umui do gini gavana bona king taudia vairanai, idia dekenai hereva momokani umui do hedinarai totona. 10 To sivarai namo bese ibounai dekenai be do haroro henia guna. 11 Idia ese umui hakaua kota taudia vairanai neganai, umui laloe guna lasi dahaka umui do gwauraia, hereva inai neganai lau do henia umui dekenai, badina be umui sibona do gwauraia lasi, to Lauma Helega ia do hereva. 12 Kakana ese tadina do ia samania, ia mase, tamana danu natuna dekenai unai bamona ia do karaia, natudia danu ese tamadia sinadia idia do samania, idia mase. 13 Lauegu ladana dainai taunimanima ibounai idia do badu henia umui dekenai, to edana tauna ia gini auka ela bona dokona, mauri ia do davaria.

14 To umui ese dika rohoroho gauna itaia neganai, iena gabu lasi dekenai ia gini, (namo duahia tauna inai hereva anina ia diba namonamo), unai neganai Iudea noho taudia namo idia heau lao ororo dekenai. 15 Ruma latanai noho tauna namo ia diho lasi ruma lalonai, iena gau abia totona. 16 Uma lalonai noho tauna, namo ia giroa lou lasi, ena dabua abia tctona. 17 Unai neganai rogorogo hahine taudia bona hahine taudia mai rata inua natudia, madi nega dika do idia davaria! 18 Umui guriguri, inai nega dika ia do mai lasi keru neganai. 19 Badina unai neganai be nega dika bada, idaunegai Dirava ese tanobada ia karaia ia mai bona harihari, dika unai bamona lasi, gabeai danu dika

unai bamona ia do vara lou lasi. 20 Bema unai nega dikadia Lohiabada ese ia hakwadogia lasi, taunimanima ta ia mauri lasi, to ia abia hidi taudia ia laloa dainai ia hakwadogia.

21 Bema tau ta ia hamaoroa umui, "Umui itaia, Keriso be iniseni," o, "Umui itaia, Ia be unuseni", umui abidadama henia lasi. 22 Badina be Keriso koikoidia bona peroveta koikoidia idia do vara, toana gaudia bona hoa karadia do idia hedinarai, kahira-kahira Dirava ena abia hidi taudia idia hakaua kerere. 23 Umui naria namonamo, unai gabei idia do vara gaudia ibounai, hari lau hedinarai vadaeni umui dekenai.

24 Unai neganai, nega dikana ia ore murinai, dina ia do dibura, hua danu ia diari lasi. 25 Hisiu guba dekena amo do idia moru, bona lauma siahudia gubai idia do mareremare. 26 Unai neganai Taunimanima Natuna idia do itaia, ori latanai ia do mai, mai siahu bada, mai hairai bada danu. 27 Ia ese ena aneru ia do siaia, lai 4 gabudia dekena amo, iena abia hidi taudia idia do haboua, tanobada gabudia ibounai bona guba gabudia ibounai dekena amo.

Parabole—Umui naria namonamo

28 Umi fig au parabole ta umui laloa, ena rigi maragina ia tubu, ena rau toana ia hedinarai, umui diba lahara negana ia kahira-kahira. 29 Unai dainai, inai gaudia idia vara umui itaia, umui diba nega be ia kahira-kahira, ia ginidae vadaeni iduara dekenai. 30 Momokani lau hamaoroa umui, inai nega noho taunimanima idia do ore lasi, ela bona inai gaudia ibounai idia do vara vadaeni.



31 Guba bona tanobada idia do ore, to lauegu hereva do ia ore lasi.

32 To unai dina bona dina gauna, tau ta ia diba lasi, aneru guba dekenai idia diba lasi, Natuna danu ia diba lasi, to Tamana sibona ia diba.

33 Umui naria namonamo, umui noga noho, badina be inai gaudia idia mai nega umui diba lasi. 34 Ia be tau ta hanua daudau dekenai ia lao bamona, iena ruma ia rakatania, iena hesiai taudia dekenai siahua ia henia, idia ta ta mai edia gaukara. Iduara naria tauna dekenai ia hamaoroa, ia naria namonamo. 35 Unai dainai, umui naria noho, badina umui diba lasi edana negai ruma biaguna ia do mai, adorahi, o hanuaboi momokani, o kokoroku boi-boi negana, o dabai. 36 Ia mai haraga garina, bona umui mahuta neganai ia umui davarua garina. 37 Inai hereva lau umui hamaoroa, taunimanima ibounai dekenai danu lau hamaoroa, lau gwau, Umui naria noho.

KAROA 14

Iesu alaia dalana idia tahua

1 Paseka bona mai hatubua gauna lasi paraoa ariana, be dina rua gabeai do idia karaia. Dubu biagudia mai itorena taudia danu dala idia tahua, ia idia dogoatao koikoi dala dekenai, bona alaia mase gwaurua. 2 Idia hereva, Aria neganai ita guia lasi, badina aria dekenai haboua taudia idia badu, bona heatu ia vara garina.

Hahine ta ena kara namona

3 Ia noho Betania hanuai neganai, Simona, lepra tauna ena ruma dekenai ia aniani. Hahine ta ia mai, bonana namo herea muramura, nadi kavabu lalonai, davana bada gauna ia mzikiaia. Inai kavabu ia makohia bona muramura ia bubua Iesu ena kwarana dekenai. 4 Unuseni noho taudia haida idia badu, idia gwau, Dahaka badina inai davana moni bada gauna ia negea kava inai bamona? 5 Bema unai bonana namo muramura ia hoia, paoni 30 abia, ogogami taudia dekenai henia, be namo. Hahine dekenai idia badu sisina. 6 To Iesu ia gwau, Umui raka-

*Kavabu*

tania. Ena kara umui koua lasi. Ia be kara namona lau dekenai ia karaia. 7 Ogogami taudia be nega idoinai idia noho umui dekenai, bona umui ura neganai kara namo umui karaia diba idia dekenai, to lau be nega idoinai umui dekenai lau noho lasi. 8 Ia diba gauna ia karaia, lauegu tau anina ia dahua, idia do guria lau totona. 9 Momokani lau hamaoroa umui, tanobada ibounai inai sivarai namo idia do haroro karaia, inai hahine ena kara idia do gwaurai, bona iena kara idia do laloatao.

Iuda ese Iesu ia samania

10 Iuda Iskariote, ia taudia 12 tauna ta, ia lao dubu biagudia dekenai, Iesu ia samania hereva ia gwaurai. 11 Dubu biagudia idia kamoni, idia moale, idia promisi moni idia do henia. Inai dekenai dala ia tahua, edana bamona koikoi dekenai do ia samania.

Dokona anibouna

12 Mai hatubua gauna lasi paraoa ariana dina gini-gunana, Paseka mamoe natuna alaia dinana, iena diba tahua taudia ese idia nanadaia, Edeseni oi ura Paseka aria ai karaia hegaegae, oi ania? 13 Ena diba tahua taudia rua ia siaia, ia gwau, Umui lao, hanua bada umui raka vareai, unuseni ranu uro huaia lao tauna umui do davaria. Ia murinai umui raka. 14 Ia raka vareai gabuna, inai ruma ena biaguna dekenai umui hereva, umui gwau, "Hadibaia tauna ia gwau, Edeseni lau bona lauegu diba tahua taudia Paseka aria do ai ania?" 15 Ruma badana ta atai ai ia do hedinarai, ia hagoevaia vadaeni. Unuseni ai iseda aria umui karaia hegaegae. 16 Diba tahua taudia rua idia lao.

hanua bada lalonai idia raka vareai, ia hamaoroa bamona idia davaria, unai gabunai Paseka aria idia karaia hegaegae.

17 Adorahi, ia bona ena taudia 12 idia mai. 18 Idia helai, aniani ania, bena Iesu ia gwau, Momokani lau hamaoroa umui, hari nega tamona ita aniani hebou tauna ta ese do ia samania lau. 19 Idia herevahereva mai lalohisi bada danu, idia ta ta ese hereva, Lau be lasi, a? Lau be lasi, a? 20 Ia idia hamaoroa, ia gwau, Taudia 12 tauna ta, ia lau danu disi tamona lalonai imana ia atoa. 21 Taunimanima Natuna ia lao, Buka Helaga ia torea bamona, to Taunimanima Natuna samania tauna, madi! Bema ia vara lasi be namo!

22 Aniani idia ania neganai, Iesu paraoa ia abia, ia guriguri Dirava dekenai ia tanikiu henia, ia makohia, idia dekenai ia henia, ia gwau, Umui abia, lauegu tau anina be inai. 23 Kapusi ia abia, ia tanikiu henia, ia henia idia dekenai, idia ibounai idia inua. 24 Idia dekenai ia hamaoroa, ia gwau, Lauegu rarana be inai, taravatu matamata ena rarana, ia bubua taunimanima momo dainai. 25 Momokani lau hamaoroa umui, lau vain huahua ranu do inua lou lasi ela bona Dirava ena basileia lalonai vain huahua ranu matamata do lau inua.

26 Idia ane abia murinai, Olive ororo dekenai idia raka lao. 27 Iesu ese ia hereva henia, ia gwau, Umui ibounai, emui abidadama lau dekenai do umui rakatania, badina inai bamona Buka Helaga ia torea vadaeni, "Mamoe naria tauna lau alaia neganai, mamoe idia do heau kava". 28 To gau tamona umui lalao, lau toreisi lou murinai lau lao Galilea dekenai, lau murinai umui mai. 29 Petro ese ia hereva henia, ia gwau, Taunimanima ibounai idia do rakatania oi, to lau do rakatania lasi momokani. 30 Iesu ia haere henia, Momokani lau hamaoroa oi, hari hanuaboi, kokoroku nega rua ia do boiboi lasi, nega toi oi do hereva, oi diba lasi lau. 31 Petro ia hereva goada, ia gwau, Bema oi mase neganai lau danu mase, lau do hunia lasi oi egu hereva dekenai. Lau do hunia lasi oi, lasi momokani. Ibounai idia hereva inai bamona.

Getesemane

32 Idia ginidae gabu ta ladana Getesemane, ena diba taudia dekenai ia gwau, Iniseni umui helai, lau lao guriguri gwauraia. 33 Petro bona Iakobo bona Ioane ia hakaua lao neganai ena lalona be ia hisihisi bada. 34 Ia hereva idia dekenai, Lauegu lauma be ia hisihisi bada mase bamona, umui noho iniseni bona naria noho. 35 Ia raka lao sisina, tano dekenai ia moru diho, ia guriguri, iena guriguri hereva be, ia do abia nega dika ia ura lasi abia, bema dala ia noho. 36 Ia gwau, Aba, Tamagu, gau ibounai oi karaia diba, inai kapusi lau dekena amo oi abia lao, to lauegu ura oi karaia lasi, oiemu ura sibona mo oi karaia.

37 Ia mai lou, ia idia davaria, idia mahuta noho. Petro dekenai ia gwau, Simona e, oi mahuta noho, a? Oi goada lasi dina gauna tamona oi naria, a? 38 Umui naria, umui guriguri, dika ese ia umui abia garina. Lauma ia ura goada, to tau anina ia manoka-manoka. 39 Ia lao, ia guriguri lou. 40 Ia mai lou, ia davaria idia mahuta lou, badina matadia idia metau, idia haere henia diba lasi.

41 Nega namba 3 ia mai lou, idia dekenai ia hereva, Umui mahuta? Umui sipele noho? Vadaeni! Negana ia ginidae. Hari Taunimanima Natuna be henia vadaeni kara dika taudia dekenai. 42 Umui toreisi, ita lao, ia samania lau tauna be kahira-kahira!

Idia dogoatao Iesu

43 Ia hereva noho neganai, Iuda, taudia 12 tauna ta ia mai. Ia danu be hutuma bada, imadia dekenai be edia kaia bona au idia dogoatao. Idia be dubu biagudia bona itorena taudia bona hanua tau babadia ese idia siaia taudia. 44 Iesu ia samania tauna ese toana ta ia henia idia dekenai, ia gwau, Lau do kisi tauna, umui dogoatao, umui hakaua lao namonamo. 45 Ia mai, bona maoromaoro ia lao Iesu dekena, ia gwau, Hadibaia tauna e! Bona ia ese Iesu ia kisi karaia. 46 Idia dogoatao Iesu, idia abia.

47 Gini kahira-kahira tauna ta ena kaia ia veria daekau, dubu biaguna badana ena hesiai tauna ena taiana ia utua oho. 48 Iesu ese idia dekenai ia hereva, ia gwau, Mai emui kaia bona au danu umui mai lau abia gwauraia, henao

tauna umui guia bamona, a? 49 Dina ibounai umui danu lau noho Dubu Helaga lalonai, lau hadibaia umui, to umui dogoatao lasi lau. To hari inai kara ia vara be Buka Helaga hamomokania totona. 50 Idia ibounai idia rakanania, idia heau.

51 Uhaul tauna ta iena murinai ia lao, rami sibona mo ia kwatua, ia danu idia dogoatao. 52 To ena rami ia rakanania, kopina kavakava ia heau.

Iesu dubu biaguna badana vairanai

53 Iesu idia hakaua lao dubu biaguna badana dekenai, dubu biagudia mai hanua tau badadia mai itorena taudia idia ibounai idia hebou. 54 Ia murinai Petro ia raka, to sisina daudau, dubu biaguna badana ena ruma lalonai ia raka vareai, hesiai taudia danu ia helai, lahi siahuna dekenai.

55 Dubu biagudia mai kaunsil taudia ibounai ese Iesu hamasea badina idia tahua, to ta idia davarua lasi. 56 Badina be hutuma ese samani hereva koikoi sibona idia henia, to edia samani hereva be tamona lasi. 57 Haida idia toresi, idia samania koikoi, idia gwau, 58 Ai kamoni ia gwau inai bamona, "Inai taunimania edia imadia dekenai karaia Dubu, lau do hamakohia, bona dina toi murinai, imana dekenai karaia lasi. gauna ta lau do haginia." 59 To idia edia samani hereva danu hegeregere lasi.

60 Dubu biaguna badana ia toresi, Iesu ia nanadaia, ia gwau, Oi hereva lasi, a? Inai taunimania idia samania oi. Edana kerere oi karaia? 61 Ia hereva lasi, ia haere henia lasi. Gabeai dubu biaguna badana ia nanadaia lou, ia gwau, Oi be Keriso, a? Oi be Ladana Bađa ena Natuna, a? 62 Iesu ia gwau, Lau inai, bona gabeai Taunimania Natuna do umui itaia, Siahu ena idiba kahanai ia helai, guba ena ori lalonai ia do diho mai. 63 Dubu biaguna badana sibona ena dabua ia darea, ia gwau, Badina dahaka ia samania daladia ita tahua noho? 64 Dirava ena ladana hadikaia herevana umui kamoni vadaeni, umui laloo dahaka? Ibounai idia gwau ia do mase namo. 65 Haida ese idia kanudia, haida ese iena matana idia koua, idia botia, idia gwau, Peroveta hereva gwauria! Hesiai taudia haida edia imadia dekenai idia botia.

Petro ese Iesu ena ladana ia hunia

66 Petro ia noho ruma henunai, dubu biaguna badana ena hesiai kekeni ta ia mai. 67 Petro lahi siahua ia abia negana, hesiai kekeni ese ia itaia, ia gwau, Oi danu be Iesu Nasaret tauna ena turana? 68 To ia gwau, Lasi, inai tau lau diba lasi, bona oiemu hereva anina lau diba lasi. Murimuri ai ia raka lao, iduara kahira-kahira, unai neganai kokoroku ia boiboi. 69 Gabeai hesiai kekeni ese ia itaia, bona gini noho taudia dekenai ia hereva lou, ia gwau, Ena turana ta be inai. 70 Petro ia gwau lou, Lasi.

Nega sisina Petro badinai gini taudia idia hereva lou, Momokani, oi be idia ta, badina oi be Galilea tauna. 71 Hereva dika siahua bada ia gwauraia, ia gwau, Hari oi hereva tau lau diba lasi, lasi momokani. 72 Kokoroku ia boiboi lou, vadaeni, Petro ese Iesu ena hereva ia lalao. Guna Iesu ia gwau, Kokoroku nega rua ia do boiboi lasi, nega toi oi do hereva, oi diba lasi lau. Vadaeni, ia lalao momo, ia tai.

KAROA 15*Iesu Pilato vairanai*

1 Daba maragi neganai, dubu biagudia mai hanua tau badadia mai itorena taudia mai kaunsil taudia ibounai idia herevahereva, gabeai Iesu idia guia, idia hakaua lao, Pilato dekenai idia henia. 2 Pilato ia nanadaia, ia gwau, Oi be Iuda taudia edia king, a? Ia haere henia, Gauna be, oi gwauraia hegeregere. 3 Dubu biagudia be koikoi hereva momo idia gwauraia, hakererea totona. 4 Pilato ese ia nanadaia lou, ia gwau, Oi haere henia lasi, a? Hereva momo dekenai idia samania oi, oi kamoni? 5 Iesu ia haere henia lasi, hereva ta ia gwauraia lasi, unai dekenai Pilato ia hoa.

6 Unai aria neganai Pilato ena kara ta be, ia dibura tauna ta, edana tauna idia gwauraia, ia do kokia dibura dekena amo. 7 Dibura lalonai tau ta ladana Baraba ia noho, guna heatu neganai ia ese taunimanima ia alaia vadaeni. 8 Hutuma ese Pilato idia noia, iena hanaihanai kara ia karaia lou. 9 Bena Pilato ese idia dekenai ia nanadaia, Umui ura Iuda edia king lau do ruhaia? 10 Badina

ia diba dubu biagudia sibodia edia badu dainai, Iesu idia abia lao kota dekenai. 11 To dubu biagudia idia hereva goada hutuma dekenai, idia gwau, Pilato dekenai umui noia, Baraba ia do ruhaia. 12 Pilato idia dekenai ia hereva, ia gwau, Dahaka lau karaia inai umui gwaurea Iuda taudia edia king dekenai? 13 Idia boiboi goada, idia gwau, Kokoa satauro dekenai! 14 Pilato ia gwau, Badina dahaka, ena dika be dahaka? To idia boiboi lou dikadika, Kokoa satauro dekenai! 15 Pilato ia ura hutuma edia ura ia karaia dainai, Baraba ia ruhaia. Bona ia ese Iesu ia dadabaia murinai, tuari taudia dekenai ia henia idia kokoa satauro dekenai totona.

Iesu idia hadikaia


16 Tuari taudia ibounai ese Iesu idia hakaua lao gavana ena ruma lalonai, bona edia ore a taudia idia haboua. 17 Iena kopina dekenai dabua kakakaka idia atoa, au ginigini dekenai kwara gauna idia karaia, iena kwarana latanai idia atoa. 18 Bona idia hevaseha bamona, idia hanamoa koikoi. Idia gwau, Oi namo? Iuda taudia edia king! 19 Bona au dekenai iena kwarana idia botai, idia kanudi henia, gabeai idia tui diho, idia toma diho koikoi. 20 Inai hadikaia kara idia haorea murinai, unai dabua kakakaka idia kokia oho, bona ena dabua korikori idia atoa lou. Gabeai idia abia lao idia kokoa satauro dekenai totona.

Iesu idia hamasea satauro dekenai

21 Kurene tauna ta, ladana Simona, Alesana bona Rufo edia tamana, gunika dekena amo ia mai, idia hamaoroa Iesu ena satauro ia huaia.

22 Idia ese Iesu hakaua lao gabu ta ladana Golgota dekenai, ladana anina be, Kwara Koukouna Gabuna. 23 Uain bona muro idia mikis bona ia dekenai idia henia, to ia abia lasi. 24 Idia kokoa satauro dekenai. Bona kasi idia gadara, ena dabua idia haria karaia taunimanima ta ta dekenai. 25 Dabai dina gauna 9 negana idia kokoa satauro dekenai. 26 Satauro latanai inai samania hereva ia noho, torea hereva be, Iuda taudia edia king. 27 Henao taudia

23 muro = hisihisi kokia muramura ta.



rua ia danu nega tamona idia kokoa satauro dekenai, ta ena idiba kahanai, ta ena lauri kahanai. 28 Buka Helaga hereva ia hamomokania vadaeni, torea hereva be, "Ia be kerere karaia taudia danu idia duahia nega tamona."

29 Raka hanaia taudia ese iena ladana idia hadikaia, bona idia hevaseha, idia gwau, Oi be Dubu Helaga oi ura makohia ore, bona dina toi murinai haginia lou tauna, a? 30 Oi sibona oiemu mauri dala oi karaia, bona satauro dekeno amo oi diho mai! 31 Dubu biagudia, itorena taudia danu idia kiri bona hereva karaia, ida gwau, Idau taudia ia hamauria, to ia sibona hamauria diba lasi! 32 Keriso, Israel taudia edia king, mani satauro dekeno amo oi diho mai, ai itaia oi, bona ai do abidadama henia oi! Ia danu nega tamona idia atoa satauro dekenai taudia rua danu idia hereva dika henia.

33 Dina gauna 12 neganai ela bona dina gauna 3, tano-bada idoinai be ia koua dibura dekenai, hanuaboi bamona. 34 Dina gauna 3 neganai Iesu ia boiboi bada, Eloi, Eloi, lama sabaktani?, hereva anina be, Lauegu Dirava e, Lauegu Dirava e, dahaka dainai oi rakatania lau? 35 Ia kahira-kahira gini noho taudia haida idia kamoni, idia gwau, Ia

be Elia dekenai ia boiria. 36 Bona ta ia heau, sipans ta vinega lalonai ia atoa diho, au latana duduna dekenai ia atoa, bona Iesu dekenai ia henia, ia inua totona. Ia gwau, Mani ita naria, bona ita itaia bema Elia dohore ia mai bona abia diho, o lasi. 37 Iesu ia boiboi bada, bona ia mase vadaeni. 38 Dubu Helaga ena dabua badana ia darea, atai dekenai amo ia lao bona henunai, kahana rua idia karaia. 39 Tuari taudia edia lohiana be ia gini kahira-kahira, ia itaia inai bamona ia mase neganai, ia gwau, Momokani, inai tau be Dirava ena Natuna!

40 Hahine taudia haida danu idia itaia noho, sisina dau-dau idia gini. Idia haida be Maria Magdalene, mai Maria, Iakobo maragina bona Iose edia sinana, mai Salome. 41 Inai hahine taudia ese Iesu ia noho Galilea neganai ena murinai idia raka, bona idia durua. Bona ia danu Ierusalem dekenai idia daekau mai hahine taudia momo danu.

Iesu idia guria

42 Adorahi neganai, badina be unai be aria karaia hegaegae dinana, kerukeru be Dina Helaga, 43 Iosepa, Arimatea hanua tauna, kara maoromaoro kaunsil tauna ta, ia danu Dirava ena basileia ia mai dinana ia naria, ia ese ia gari lasi bona ia lao Pilato dekenai, ia noia Iesu ena tau anina ia henia. 44 Iesu ia mase vadaeni herevana Pilato ia kamonai, ia hoa, tuari taudia lohiana dekenai ia boiria. Ia nanadaia edana negai ia mase. 45 Tuari lohiana ese Iesu ena mase ia hamomokania murinai, Pilato ese tau anina ia henia Iosepa dekenai.

46 Iosepa ese dabua namona ia hoia, bona Iesu ena tau anina ia abia diho, ia kumia dabua dekenai, bona ia atoa gara gabuna lalonai. Inai gara be matu, nadi badana lalonai. Gabeai nadi badana idia doria lao, gara ena iduara idia koua. 47 Maria Magdalene, bona Maria, Iose ena sinana, ese Iesu ena tau anina hekure gabuna idia itaia.

36 *vinega* = *vain au huahua ena ranu ta.*

KAROA 16

Iesu ia toreisi lou

1 Dina Helaga ia ore murinai, Maria Magdalene mai Maria, Iakobo ena sinana, mai Salome, bonana namo muramura idia hoia, iena tau anina dekenai idia atoa totona. 2 Pura ena dina ginigunana, dina ia daekau daba maragi neganai, idia lao gara gabuna dekenai. 3 Idia sibona idia herevahereva, Daika ese inai gara koua nadi do ia kokia? 4 Matadia idia negea atai dekenai, idia itaia, koua nadi badana be ena gabu dekenai ia noho lasi. 5 Gara gabuna idia vareai neganai uhau tauna ta ia helai idiba kahanai, idia itaia. Iena dabua be lata bona kurokuro. Idia gari bada. 6 To ia hereva henia, ia gwau, Umui gari lasi, umui Iesu, Nasaret tauna, idia alai mase satauro dekenai, umui tahua noho, to ia toreisi lou vadaeni, iniseni ia noho lasi. Guna ena tau anina idia atoa gabuna mani umui itaia. 7 Umui lao, ena diba tahua taudia bona Petro dekenai umui hamaoroa Iesu ia lao umui vairanai Galilea dekenai. Unuseni umui do itaia, umui dekenai ia hamaoroa guna bamona. 8 Karaharaga idia raka lao murimuri ai, gara gabuna idia rakatania, idia heau, badina idia hoa bada bona heudeheude. Tau ta dekenai idia hamaoroa lasi badina idia gari.

9 Iesu ia toreisi murinai, pura ena dina ginigunana daba maragi neganai, kara ginigunana ia karaia be ia gini Maria Magdalene vairanai, ia itaia. Guna Maria Magdalene dekena amo lauma dikadia 7 ia lulua oho. 10 Maria ia lao, guna idia noho Iesu danu taudia dekenai ia hamaoroa, idia tai noho neganai. 11 Iesu ia mauri bona Maria ese ia itaia herevana idia kamoni neganai idia abidadama henia lasi.

12 Gabeai idia rua gunika dekena idia raka lao gwaurai. Iesu, idau tauna bamona, ia sibona ia hedinarai idia dekenai. 13 Idia raruosi idia lao, idau diba tahua taudia dekenai idia hamaoroa, to idia abidadama henia lasi.

14 Gabeai inai taudia 11 idia aniani neganai, Iesu ia mai, idia itaia. Idia dekenai ia gwau henia edia abidadama lasi dainai, bona edia lalo auka dainai. Badina Iesu ia mase

dekena amo toresi lou itaia taudia edia hereva idia abidadama henia lasi. 15 Idia dekenai ia hamaoroa, ia gwau, Umui lao tanobada kahana ibounai dekenai. Sivarai namo umui haroro henia taunimanima ibounai dekenai. 16 Daika daika idia abidadama henia bona bapatiso idia abia, mauri idia do davarua, to abidadama henia lasi taudia Dirava ena Kota Badana dekenai idia do lusi momokani. 17 Abidadama taudia inai hoa karadia idia do karaia, lauegu ladanai lauma dikadia idia do lulua oho, gado matamata idauidau idia do hereva. 18 Gaigai idia do abia isi, bema mase muramura idia inua kerere neganai, ia do hadikadia lasi, edia imadia gorere taudia latanai idia atoa neganai, gorere do ia ore.

19 Lohiabada Iesu ia hereva henia idia dekenai vadaeni, guba ese ia abia daekau, bona Dirava ena idiba kahanai ia helai diho. 20 Idia lao vadaeni, gabu ibounai idia haroro. Lohiabada idia danu nega tamona ia gaukara, bona hoa karadia dekenai idia edia Hereva ia hamomokania vadaeni.

GLOSSARY

abidadama	kamonai dogoatao momokani, daradara lasi.
aneru	Dirava ena hesiai laumadia.
aposetolo	Iesu ia abia hidi bona siaia lao sivarai namo gwauraia totona taudia.
basileia	gau ibounai bona taunimanima ibounai king ta ia biagua.
Beel-sebul	Satana.
dibagania	ia ura kara dika lalonai hakaua.
Farisea	Iuda edia dubu taudia haida, taravatu momo bona guriguri kara momo idia dogoatao.
gara gabuna	mase taudia guria gabuna.
gwauatao	kara dika davana ia kokia, ia laloaboio vadaeni.
helalo kerehai	bogahisihisi momokani kara dika dainai, giroa Dirava dekenai, kara dika rakatania, bona karaia lou lasi.
heuda hanai	idau tauna ena adavana sihari kara.
itorena taudia	Iuda taravatu diba taudia.
Keriso	Hamauria Tauna, Iuda peroveta taudia idia gwauraia ia do mai.
lepra	toto momo gorereana ta, lepra taudia idia ato hanua murimuri ai badina idia gwau idia be miro.
parabole	Dirava ena Hereva Momokani anina Iesu ia hedinarai sivarai dekenai.
Paseka	Iuda taudia edia aria helagana ta, gunaguna Egypt taudia dekena amo Dirava ese ia hamauridia karana idia laloatao.
peroveta tauna	tau ta, Dirava ena ura ia hedinarai, bona dohore idia vara gaudia ia diba.
satauro	au ta, ia latanai gunaguna taudia ese kerere taudia idia alaia mase. Au dekenai idia kokoa, bona idia rakatanidia ela bona idia mase.
Taunimanima Natuna	Iesu.
toma diho	diho tano dekenai bona hanamoa henia.
tui diho	diho tano ai aena dekenai bona noinoi karaia.
uain	vain au huahua ena ranu.

